


बिबन

त्रि-रत्न

Tri-Ratna

प्यला: पौ




बौद्ध विहार संघ

अक्षयेश्वर महाविहार


पुचवः, यल





त्रि-रत्न

प्यला-पौ



दं : १

ल्या : १

ने.सं. ११४० कछला

२०७६ कार्तिक

संरक्षक

नानीकाजी शाक्य

नाथो

संयोजक/सम्पादक

गौतममुनि बज्जाचार्य

सम्पादक मण्डल

चन्द्रबहादुर शाक्य

सानुमान बज्जाचार्य

पुष्पराज बज्जाचार्य

ग्वहाली

अनिलबीर बज्जाचार्य

मिलन शाक्य

ज्ञानेन्द्र शाक्य

खेमराज शाक्य

सुरेन्द्रकुमार शाक्य

विश्वास बज्जाचार्य

सन्दिरा बज्जाचार्य

बुद्धलक्ष्मी शाक्य

मुद्रक

राजमति प्रेस

फोन : ५५३४५२७

पिकाक

बौद्ध विहार संघ, यल

अक्षेयश्वर महाविहार

पुच्वः, यल ।

फोन : ५५२७६७०



विद्याचरणसम्पन्न सुगतो लोकवित्परः ।

निर्ममो निरहंकारः सत्यद्वयनयस्थितः ॥

नामसंगीति

विद्यायाआचरणं संयुक्तम्ह, भिनंकवम्ह तथागत, लोकस्यूम्ह,
तःधम्ह, जिगु धयागु मदुम्ह, जि धयागु अहंकार मदुम्ह, संवृति सत्य
व परमार्थ सत्य निगुया मार्गे च्वम्ह ।

कायेनैव पठिष्यामि वाक्पाठेन तु किं भवेत ।

चिकित्सापाठमात्रेण रोमिणः किं भविष्यति ॥

बोधिचर्यावतार

शरीरं हे आचरण याये, म्हुतुजक पाठयाना छुयाये ?

आचरण मयासे म्हुतुजक हालाजुया छुहे सार दइमखु ।

सब्बे सङ्खारा दुक्खाति यदा पठ्जाय पस्सति ।

अथ निब्बिन्दति दुक्खे एस मग्गो विसुद्धिया ॥

धम्मपद

फुक्क संस्कार (नाम, रुप, धर्म) दुःख खः धका गुबले प्रज्ञा ज्ञानं
खंका काइ उबले सांसारिक दुःखं विरक्त जुइ । थ्व हे विशुद्ध
जुइगु मार्ग खः ।

गुइतःया तग्वः चिभाः



ज्ञानेन्द्र शाक्य

यल देय्या पूर्वखि सिथय् लाःगु ऐतिहासिक महत्वं जायाच्वँगु प्राचीन थाय् गुइतः त्वाः खः । थुगु त्वालय् प्रथम श्री महाविहार, वसुच्चशील महाविहार व गुस्तल महाविहार नाँया स्वँगु मूल बहिःत छथासं दया थःथःगु हे संघ व्यवस्था दया च्वँगु लगायत अनेक विशेषतां जाःया च्वँगु दु । सक्षिप्तं थुपि विशेषतात थुकथं दु ।

१) धँल्याः हिटी व गुइतः अजी - गुँला पर्वया अवसरय् बहिःछः ब्वयेगु परम्परानुसारं थन त्वालय् धँल्याः हिटी व गुइतः अजीया प्रतिमा ब्वया तइगु दु । गुकि यात आपालं श्रद्धालुपिन्सं भाद्र कृष्ण प्रतिपदा कुन्हु थन वया दर्शन व पूजन याःवयेगु यानावयाच्वँगु दु ।

२) तुलाँ पौ - दीपंकर तथागत प्रमुख भिक्षुसंघ विज्याका सर्वानन्द जुजुं दीपावती नगरय् सम्यक् दान पञ्जदान न्यायेकुगु बाखँ दुथ्याना च्वँगु सर्वानन्द नृप जातक चित्रित ३६ फिट हाकःगु तुलाँ पौ बहीद्योः ब्वयेगु भुवलय् ब्वयेगु यानावयाच्वँगु ।


३) पञ्जदान पर्व - पञ्जाष्टमीया दिनस पञ्जदान न्यायेका हनेगु परम्परा दकले न्हापां शुभारम्भ जूगु थाय् या रूपय् प्रसिद्धगु ।

४) गुंगु अंक लिसे संयोग - थुगु त्वाः गुंगु तला दुगु देगः, गुधाः हिटी, गुंगु तं आदि गुंगु अंक मिलय् याना धर्मकिर्ति त निस्वना तःगुलिं 'गुसतल' धका नामाकरण जुया च्वँगु ।


५) बुद्ध मूर्ति - नेपाःया बहा बहिःस स्थापना याना तःगु क्वापाःछः, गन्धुरीदेवताया मूर्ति त मध्ये दक्खिसिवे तःधिकःगु बुद्ध मूर्ति निस्वना तःगु ।

६) सर्वप्राचीन अभिलेख - यल देशय् दुगु बहाःबहिःस दया च्वँगु अभिलेखत मध्ये दक्खिसिवे पुलाँगु शिलाभिलेख' दुगु बहिः प्रथम श्री महाविहार जुया थुगु बहिः ऐतिहासिक प्रमाणया आधारय् हालया लागि सर्वप्राचीन बहिः जुया च्वँगु दु । (राजवंशी, २०७२, पेज - ७४)

थुजाःगु हे अनेक विशेषतां जाया च्वँगु थुगु त्वालय् निस्वना तःगु थी थी धर्मकिर्ति त मध्ये वसुच्चशील महाविहारया चुलंचु च्वँगु तःगो चिभाः (धान्याराश्याकृति चैत्य - हिटी फुसेच्वँगु चिभाः) व गुस्तल महाविहारया चुलंचु च्वँगु तग्वः चिभा (वेदिकोपरिस्वयम्भू चैत्य - गःसि चिभाः) नं खः (शाक्य, २०५० पेज-४८) । थुपि मध्यय् हिटीफुसय् च्वँगु चैत्यया ऐतिहासिक सांस्कृतिक महत्त्व व चैत्य वास्तुकलाया म्हासिका थन न्हयथनागु दु ।



गुइतः त्वाःया नक्सा



गुडतःया हितिफुसय् च्वंगु तवः चिभाः
(धान्याराश्याकृति चैत्य)

स्तुप - चैत्य - चिभाः

बौद्ध वास्तुकला धायेबले प्रमुखतः विहार व स्तुप वा चैत्य न्ह्योने वइ । विहार बुद्ध सहित भिक्षुसंघ च्वनेत दयेका तइगु आवास खः थें स्तुप व चैत्य बुद्ध व बुद्धज्ञानया प्रतिक स्वरूप पूजा, ध्यान व प्रशिक्षणया लागि निर्माण याइगु वास्तुकला खः गुकि विहारय् थें दुने वना निवास यायेगु याइ मखु । स्तुप व चैत्य दयेकेगु परम्परा बुद्ध सिवे यक्व न्हापां निसैं हे दुगु खः । अथेहे बुद्धकालय् बुद्धया अस्थिधातु, केशधातु, दन्तधातु गर्भय् तथा चैत्य दयेकेगु प्रसँग थन उल्लेखनीय जु । बौद्ध वाङ्मयय् चैत्य प्यथी कथं ब्वथलातःगु दु ।

- १) **शारीरिक चैत्य** - भगवान बुद्धया शरीरया अस्थि अथवा अन्य धातु गर्भय् तथा दयेका तइगु,
- २) **परिभोग चैत्य** - भगवान बुद्धं प्रयोग याःगु वस्तु गर्भय् तथा दयेका तइगु,
- ३) **उद्देश्य चैत्य**- लोकय् पुण्य अभिवृद्धि यायेगु पवित्र उद्देश्य श्रद्धालुपिन्स दयेकिगु,
- ४) **धर्म चैत्य**- धर्म संग्रहयाःथाय्, संयायन याःथाय् उकिया संस्मरणया रूपय् दयेकिगु वा अमूल्य धर्मस्कन्ध गर्भय् तथा दयेकिगु

नेपालय् हाल स्तुप, चैत्य व चिभाः पर्यायवाची कथं छ्यलेगु याः । यद्यपि थुपिं खँवःतय् दथुइ छुं भेद दु । थुकियात छको दुवाला स्वये ।

स्तुप -

‘स्तुप’ खँवःया अर्थ इतिहास कालक्रमानुसार थी थी कथं दु । उपिं मध्यय् अस्थिधातु तथा चा व लोहें दौमुना दयेकिगु द्वं यात बुद्धकालय् ‘थुवे’ धाइगु खः । उथेंहे जाःगु द्वंयात नेपालय् ‘थुवे’ खँवः अपभ्रंश जुया ‘थुर’ धका धयावयाच्वंगु दु । थ्व थुवे यात संस्कृतं स्तुप धाइगु खः । नेपालय् यलया प्यंग थुर वाहेक द्वक्व थजागु वास्तुकलायात चैत्य हे धका सम्बोधन यानावयाच्वंगु दु । स्वयम्भू महाचैत्ययात स्तुप धका सम्बोधन गनयाना तःगु मदु । अंग्रेज लेखकपिन्स जक स्तुपा धका प्रयोगय् हःगु खः । उकिं नेपाःया सन्दर्भय् यलया प्यंग थुर जक स्तुप खः । बाकि दक्व चैत्य खः ।

चैत्य -

चैत्यया अर्थ दुवाला स्वयवले पं हेमराजं (२०५०) स्वथी कथं न्ह्यवया तःगु दु ।

क) **‘चित्त चैतन्य चैत्य’**- स्वयम्भू पुराणस दुथ्याना च्वंगु शाक्यमुनि बुद्धं श्री स्वयम्भू महाचैत्य दर्शन याःविज्यावले याःगु स्तुति वाक्यस चैत्ययात ‘नैराकारं निरञ्जनं गगनवदनिशं चित्त चैतन्य चैत्य’ अर्थात् आकाश समान जुया छुं आलम्बनलिसे लिप्त मज्जुगु प्रभाश्वरथें सर्वदा प्रकाशमान जुयाच्वंगु सदाकालं जागृतगु चैतन्य स्वरूप चित्त हे चैत्य खः धका परिभाषित याना तःगु दु ।

ख) **‘चिताया वस्तु’**- बुद्ध बोधिसत्त्वपिनिगु शरीरयात विधिवत् आदहनोत्सव अग्नि संस्कार यायेधुंका ल्यंदैगु अस्थिधातु अर्थात् चित्तिवस्तुयात नं ‘चैत्य’ धाई । थुजागु चित्तिवस्तु संग्रहयाना अनुयायीपिन्स

भविष्यपर्यन्त वसपोलपिनिगु गुण लुमका गौरव
तयेगु, धर्म सवेग उत्पन्न जुइकेया लागि स्थापना
याइगु स्मारकयात नं 'चैत्य' धका धाई ।

न) बुद्धया पुण्यकिर्तिया संग्रह - भगवान बुद्धया गुलिनं
पुण्य किर्ति दु, उगु सम्पूर्ण कुशलमूल संग्रहयात
नं चैत्य धका धया तःगु जुल ।

समग्रय् स्वयवले बुद्ध ज्ञानया प्रतिक कथं
धर्म सवेग उत्पन्नयायेगु निमित्तया रूपय् प्यंगू सवेजनीय
स्थल (बुद्ध जन्मस्थल, ज्ञान लाभ याःगु थाय्, धर्मचक्र
प्रवर्तन याःगु थाय् व महापरिनिर्वाण जूगु थाय्) लगायत
मनतयगु वस्ती नगरया थाय् थासय् दयेका तइगु
धर्मया चिं यात हे चैत्य धका थुइकेमा ।

नेपाःयागु सन्दर्भय् नेपालमण्डलया बौद्ध
संस्कृतिया मुक्कं आधार स्वयम्भू धर्मधातुवागिश्वरया
ज्ञान जुयाच्चंगु जुया नेपाया दक्कं चैत्य आदिबुद्ध धर्मकाय
स्वरूपगु स्वयम्भू महाचैत्ययागु हे प्रतिलिपि कथं दयेका
तइगु खः । उकिंजुया नेपाल मण्डलस दयेका तइगु
दक्क चैत्यय् निम्नानुसार लक्षण प्रमाण अनिवार्य रूपं
दया चवनी ।

- १) नागहृदया प्रतिक - नागहृदया प्रतिक स्वरूप नागो
नं धिरेयाना तइ । अन्यथा लः याप्रतिनिधित्व
जुइगु अन्य वस्तु आकृति दयेका तइ ।
- २) पलेस्वाँ - अनं चवय् सहस्रदल पलेस्वाँ स्वरूप
पञ्चावली
- ३) चैत्य ग्वः - पलेस्वाँ नं उत्पन्न जूगु ज्योतिरूपयात
तोपुया तःगु चैत्य ग्वः ।
- ४) मिखा व उर्णा च्वया तःगु हर्मिका,
- ५) नेपाःया मौलिक शैलीया मज्जू - त्रयोदश भूमि
तगिं, यष्टिमूल व ज्योतिरूप स्वरूप उष्णीष
चुडामणि सहितगु गज्जू


चिभाः -

विभिन्न थाय् थासय् प्रतिष्ठापित जुया च्वंगु
चैत्य चिभाःया स्थापना सम्बन्धी अभिलेखय् उल्लेख
जुया च्वंगु खंग्वःत व उकिया विकासक्रमयात
विचाःयाना स्वय् वले 'चिभाः' खंग्वःया व्युत्पत्ति
सम्बन्धी निगू कथंया धारणा कायेमाःगु खनेदु ।

क) चैत्य विहार

'चिभाः' खंग्वः 'चैत्य विहार' धैगु संस्कृत
खंग्वलं वःगु खः । थी थी प्राचीन मध्यकालीन
शिलालेखय् 'चैत्य विहार', 'चैत्य वाहार', 'चितु वहार',
'चैते वाहार' धैगु खंग्वः छयलेगु याना च्वया च्वंगु
दु । थथे 'चैत्य' व 'विहार' निगू खंग्वः स्वाना छगू हे
खंग्वः कथं छयलेगु याःगुया निगू कारण जुइफुगु
अनुमान दु ।

- १) चैत्य विहारया अभिन्न अङ्ग - प्राचीनकाय्
चैत्य विहारया अभिन्न अङ्ग कथं दयेकीगु जुया
चैत्य विहार खंग्वः नाप नापं प्रयोग जूगु खनेदु ।
- २) विहारया आकृति कथं दयेका तःगु प्यकुँलाःगु
संरचनाय् द्यःने दिका तःगु चैत्य- हानं शैली
कथं विचायाना स्वयबले स्वयम्भू, खास्ति थें
जाःगु चैत्यया गर्भगृह गुम्बज जक तग्वः जुइक
दयेका तइगु यात अप्पोयाना चैत्य वा महाचैत्य
जक धाइगु खःसा निगु तला, स्वंगु तला छें थें
जाःगु चतुष्कोणाकार
आधार तथा उकि
द्यःने तिनि चैत्यया
ग्वः दिका तइगु शैली
यात 'चिभाः' धायेगु
याःगु खनेदु ।
गुम्बजाकार स्तुपया
क्वय् या आधार एक
तले, बहुतले संरचना



विहारया आकृति खः । थुकिइ लुखा, इयाः, पौ, धलिं आदिया आकृति किया तःगु दै । थुकथं विहारया आकृतिया द्यःने स्वयम्भूया स्तुपाकार ग्वः दिका चैत्य व विहारया संयुक्त स्वरूप जुया च्वँगु जुया थुकियात चैत्य विहार धायेगु याःगु खः । थ्व हे शब्द अपभ्रंस जुया 'चि बाहाः' जुल । हान 'चि बाहा' खँग्वः 'चिभाः' जुवंगु खः ।

ख) चैत्य भट्टारक-

चैत्यया प्रतिष्ठा सम्बन्धी विभिन्न शास्य दया च्वँगु शिलाभिलेखय् 'चैत्य भट्टारक'^३, 'चैत्र भट्टारक'^४, 'चैते भदाद'^५, 'चैत्र भण्ड'^६ आदि प्रयोग जुयाच्वँगु खनेदु । 'चैत्य भट्टारक' खँग्व हे अपभ्रंश जुया लिपा 'चिभाः' जुगु खः धैगु नं विज्ञपिनिगु धापू दु ।

गुइतःया हिटिफुसय् च्वँगु तग्वः चिभाःयात नं चिभाः हे धाइगु खः यद्यपि थ्व स्वयम्भू, खास्ति चैत्यया पहःया खः । उकिं थ्व चिभाःया सन्दर्भय् क.२ कारण मिले मजू । क.१ वा ख. या कारण जक सम्भव दु ।

गुइतः तग्वः चिभाया भौतिक स्वरूपया वर्णन

वसुच्चशील महाविहार चिधँबहिःया पूर्वरिखे, बहिःलिं पिने गन्धुरीदेवताया चुलंचु यानाः दयेकातःगु तग्वः चिबाहाः वास्तुकला व प्राचीन मूर्तिकलाया छगू महत्वपूर्ण उदाहरणया कथं धस्वाना च्वँगु दु । थुगु चैत्यया दक्षिणपाखें सत्तिक गाःहिटी दु उकिं थ्व चिभाः यात हितिफुसे च्वँगु चिभाः धका म्हसिके फु । अथेहे गुइतः पुखू, तधिकम्ह गणेद्यः, चिधिकम्ह गणेद्यः, लाय् ब्वः आदि थुगु चिभाःया जवखंवया महत्वपूर्ण वस्तुत खः । थुगु चैत्यया शैली कथं थुकियात धान्याराश्याकृति चैत्य^७ धका उल्लेख याना तःगु दु । थुगु तःगः चिभा मुक्कं गुंग चैत्यं युक्त जुया नवचैत्यया संयुक्त स्वरूप जुयाच्वँगु दुः । गथे

धासाः थुर थें आकार जुयाच्वँगु तग्वगुः मूल चैत्य - १ ग, थुगु तग्वःगु चैत्यया अण्डभाग लिसे प्यपुना च्वँगु प्यँगु दिशाय् निर्माण याना तःगु पञ्चबुद्धया देगःया गजूया रूपय् फुसे निस्वनाः तःगु प्यँगः लिच्छिवि चैत्य^८ (थुगु शैलीया चैत्ययात अशोक चैत्य धका नं म्हसिका वया च्वँगु दु) - ४ ग, व तग्वःगु चैत्यलिसे भचा तापाक्क प्यंगु कोणाय् दयेकातःगु प्यँगः देगःचाया शीर्ष स्थानय् तथा तःगु प्यँगः लिच्छिवि चैत्य - ४ ग याना मुक्कं गुंग चैत्यया कलापूर्ण संयोजन थुकि जुया च्वँगु दु । तग्वःगु चैत्य एवं मेगु देगःचात दक्क १ फिट जाःगु फलय् दिका तःगु दु । चैत्यया थुगु फः चैत्य परिक्रमा यायेत गाक्क थाय् छिंका दयेका तःगु दु । चैत्य परिक्रमाया इवल्य् माने चाहिकेत चैत्यया छचाखेरं ओं मणिपद्मे हँ या षडक्षरी मन्त्र लिखित माने नं तथा तःगु दु । थुगु चैत्ययात क्वँ निसे च्वयेतक्क स्वया वनेवले थी थी तगिं तगिं याना थुगु चैत्य निर्माण जुया च्वँगु दु । थुपिं तगिं तयेगु वारे छसि कथं वर्णन थुकथं न्यथना च्वना ।

१) चिभाः फः

मूल चिभाःया दक्कसिबे क्वय्या तगिं २ फिट जाःगु वृताकारगु फः खः । थुगु वृताकार फःयात संस्कृत भाषा 'वेदिका' धकाः धाई । वेदिका नं नाःगोया द्यःने दिका तःगु थें याना दयेका तःगु दु । नाग धैगु लः या प्रतिक खः ।

२ ग्वः (अण्ड)

वेदिकाया च्वसँ पञ्चावली स्वरूपं भयो व उकिया द्योने नाःगो दयेका उकिं च्वय् चिभाःया अर्धगोलाकार 'ग्वः' अर्थात् 'अण्ड' (संस्कृत भाषा) दयेका तःगु दु । थुगु गुम्बज करिव १३ फिट जाः याना दयेका तःगु दु । थ्व गुम्बज बुद्धकाल व बुद्ध सिबे न्हापां निसे प्रचलनय् दुगु अस्थि वा अन्य वस्तु दुने तथा लोहँ वा चा द्वँ मुंका दयेकिगु 'थुवे' या स्वरूप

खः । 'अण्ड' या अर्थ 'बीज' खः । थुगु 'खँ' स दुने द्वक्व संसार न्ह्यना च्वँगु दुसा थ्व 'खँ' हे संसार नं खः । थुगु ग्वः यात विभिन्न बौद्ध साहित्यय् 'गर्भ', 'हिरण्य गर्भ', 'गर्भगृह' धका नं धया तःगु दु । थुकिया हे कारणं चैत्ययात 'धातु गर्भ'^९ नै धायेगु याः । थ्व कथं चिभाःया ग्वः संसार व निर्वाणया संयुक्त रूपया प्रतिक खः । उकिं ग्वः या गोलाकार पिण्ड संसार खः सा उकिया केन्द्र विन्दुतथागतगर्भया प्रतिक खः । थ्व हे तथागत गर्भयात विभिन्न सन्दर्भय् धर्मकाय, बोधिचित्त, आलय विज्ञान, बुद्ध गर्भ, सुगतगर्भ धका नं धायेगु याः । उकिं थुगु गर्भगृहयात चैत्य गर्भ धका नं धाई । थुगु ग्वः दिका तःगु भयो व नागो बाँलुगु तगि पद्मावली अर्थात् पलेहःया प्रतिक खः । पलेहःया अर्थ, अलिप्तता वा पवित्रता खः । पलेहःया द्यःने दिका तःगुया अर्थ (सुविशुद्धगु, सम्पूर्ण क्लेशपाखँ अलग्ग जुया च्वँगु अमूल्य महारत्न जुयाच्वँगु सारतत्त्व सुरक्षित जुयाच्वँगु धैगु खः (शाक्य २०५०, पेज २८) । माध्यमिक दृष्टि स्वयेवले शून्यता ज्ञान कथं संसार व निर्वाणय् छुं भेद खनि मखु । थुजागु हे सुविशुद्ध धर्मधातु ज्ञानकाय धर्मकाय स्वरूपगु चैतन्यया प्रतिक स्वरूप चैत्यया ग्वः दयेकातःगु खः । (Snodgrass, 1992)

३) 'चकूः' वा 'हर्मिका'

गुम्बजया द्यःने निगः मिखा व उर्णा च्वयातःगु वर्गाकारगु चकूः (संस्कृत भाषा 'हर्मिका' धका धाई, गनं थुकियात 'गला' धका नं धाई) दयेका तःगु दु । प्राचीन अशोककालीन स्तुपस अण्डया द्यःने यःसि पिहाँ वया च्वनिगु व उकियात छ्चाखेरं वालचिना (Fence) तइगु कथंया संरचना दयेकिगु खः । थ्वहे संरचना लिपा विकासक्रम लिसे थुकथं वर्गाकार संरचना दयेकेगु यात । नेपालमण्डलय् दुगु मेमेगु चैत्यय् नं हर्मिकाया शैली सादा कथं जक दयेका उकि मिखा व उर्णा च्वया तइ । बुद्धकालया शब्द हम्मीय^{१०}, हर्म्य

अर्थात धिरेयानातःगु थाय् धैगु शब्द हे संस्कृत भाषय् हर्मिका जू वःगु खः । चैत्यया विकासक्रमया इवल्य् थुकियात थी थी कथंया प्रतिक स्वरूप दयेकेगु यात । उकि मध्ये हर्मिका बोधिमण्डप अर्थात् बोधिज्ञान लाभ यांना विज्याःगु आसन गुगु स्थानं ज्ञानया ज्योति दक्व दिशाय् प्रसारित जुल । थ्वहे कारणं हर्मिकाया द्योने बुद्धभूमि बोधिसत्त्व भूमि रूपी भिन्स्वतगिं दिका तःगु जुल । अथेहे प्यँगू दिशाय् मिखा च्वयेगु प्रचलन नेपाःया मौलिक परम्परा कथं नेपालय् न्ह्यात गुगु लक्षण नेपाली चैत्यया म्हसिका जू वन । हर्मिकास च्वया तइगु मिखा बुद्धया मिखा खः गुकियात 'वज्रदृष्टि' धका धाई (Gutschow, 1997) । थुपिं प्यँगू दिशाय् च्वया तइगु मिखा वैरोचन बुद्धया संस्मरणकथं बुद्धया ज्ञानचक्षुं सर्वत्र भुवनय् सुदृष्टिं स्वयाच्वँगु धैगु अर्थ जुल ।

निगः मिखाया दथुइ जव तइकातःगु सँ अर्थात् 'उर्णा' च्वयातःगु दु । भगवान बुद्धया स्वीनिता महापुरुषलक्षण मध्ये कपालय् दइगु 'उर्णा' छगू नं खः । ललितविस्तर ग्रन्थय् उल्लेख जू कथं थुगु उर्णा रश्मी पिहावया मारचक्रयात नष्टयाःगु प्रसंग कथं थुगु उर्णा बुद्धया उगु मारजित रश्मीया प्रतिक नं खः । थुकियात तिलकरश्मी व गभस्तिमाला धका नं धाई ।

४) त्रयोदश भूमि तगि^{११}-

हर्मिकाया द्यःने नं नाःगो, भयो आदि तया उकिया द्यःने त्रयोदश भूमीया प्रतिक कथं वर्गाकारगु भिन्स्वँगू तगिं दयेका द्यतनातःगु दु । प्रत्येक तगिं क्वय्या सिवे च्वय्या तगिं भचा भचा चिधँ याना दयेका तःगुलिं थुगु भाग त्वाथः थे जुया गजू थँ आकार जुया च्वामुया वनाच्वँगु दु । गुइतःया निगोलं चैत्यया त्रयोदश भूमि खास्ति चैत्यया पहः वयेक वर्गाकार याना दयेका तःगु दु । उकि थँ हे हलःपौ रहित जुया च्वँगु दु ।^{१२} नेपालमण्डलय् प्रतिष्ठापित

चैत्यस थी थी कथं थुपिं भूमि तया दयेकिगु परम्परा दु । न्यागू, न्हेगू, भिन्धगू, भिन्धवंगू तगिंयाना दयेका तइगु मध्ये गुइतःया थुगु चिभाः भिन्धवंगू तगिंयाना दयेकातःगु जुया थुकियात वर्गीकरण कथं वज्रयानभूमि चैत्य धका धाइगु जुल^{१३} । (शाक्य, २०५० - पेज १४, Gutschow 1997 pg 23) योगदर्शन अभ्यासय् छसिंकथं पारजुया वनाच्वंगु जुया थुकियात धर्मपारङ्गतभूमि धका नं धाइ । थुकिइ नियमानुसार मार्गफलय् क्रमशः प्रतिष्ठित जुजुं वना बुद्धत्व प्राप्त यायेगु महाअनुक्रम क्यना च्वंगु खः गुकियात बुद्धयान धका धाई । थुपिं मध्यय् क्वं निसँ न्यागू तगिं तक्कयात श्रावक भूमि खः, अनं च्वय् गुंगुगु तगिं तक्क प्रत्येकभूमि खः, अनं च्वय् भिगूगु तगिं तक्क महायानभूमि खः सा अनं च्वय् भिन्धवंगुगु तगिं वज्रयानभूमि खः ।

५) अम्बसाहाः

त्रयोदश भूमि तगिंया च्वसं छगः पादशीला तया उकिया द्यःने क्यरावाय्मो तया तःगु दु । थुगु बाय्म्वःअम्बः माः चिना दयेका तःगु थँ आकृति ज्याना दयेकातइगु जुया थुकियात 'अम्बसाहाः' वा 'अम्बः' वा संस्कृतं 'आमलक' धका धाई । थुगु आकृति हिन्दु वा बौद्ध देगः न्ह्याग्गुलि नं गजुया क्वसँ दयेका तई । उलिजक मखु परम्परागत बुद्धा कयातःगु थँ स्वल धासां नं थजाःगु अम्बसाहाःया आकृति तयातःगु खने दै । प्राचीनकालय् अशोक स्तम्भया छ्योः (capital) या छगू भागया रूपय् दयेकेगु चलन जूगु खः । नेपाःलय् नं शुरुशुरुया लिच्छिवि चैत्य (अशोक चैत्य)य् गजूलिइ थथे अम्बःसाहा तयेगु चलन मदु वरू चैत्यया क्वय् पाखेया भागय् कयातइगु थँया आकृतिइ थँया छ्योया रूपय् अम्बसाहा प्रयोग जुया च्वंगु दु (उदाहरणः आल्को हिटीया अशोक चैत्य, Gutschow 1997 pg 144)। विकासक्रमया इवलय् लिपा लिच्छिवि चैत्यय् व क्यौं लिपाया चैत्यय् थुगु अम्बसाहाः चिभाः वास्तुशैलीया अनिवार्य लक्षण

कथहे त्रयोदश भूमि तगिंया च्वसँ तयेगु याना वयाच्वंगु दु । अम्बःसाहाया थुगु आकृति बुद्धत्वया तेजं थिना च्वंगु सूर्यया प्रतिक कथं तइगु खः । नेपाःया चैत्य सम्बन्धी हस्तलिखित ग्रन्थय् थुगु अम्बसाहाः अथवा केरावायेम्बः यात आष्फानकविशुद्धी धका संज्ञा विया तःगु दु (Gutschow, 1997 pg 23) । भगवान बुद्धं खुदँतक याना विज्याःगु दुष्करचर्याया क्रमय् आष्फानक योग याना विज्याःगु खः । उकिं दुष्करचर्या पाखँ पुला वना प्राप्त जूगू बोधिज्ञानया प्रतिक कथं थुकियात आष्फानकविशुद्धी धाःगु खः ।

६) यःसि (यष्टिका)

अम्बसाहाःया च्वसँ सिंयागु थँ थे जाःगु आकृति थहाँ वयाच्वंगु दु । गुकिया 'यःसि', 'यष्टि', 'यष्टिका', 'यूप', 'यष्टिमूल' आदि विभिन्न खँग्वलं म्हसिकावयाच्वंगु दु । थुगु यःसिं चैत्यया जगं निसँ थहाँ वया च्वंगु खः । स्वयम्भू, खास्ति, गुइतः, पिम्वाहा, दौवहा, यट्खावाहा, सिंहवाहा, चिलचववाहा (किपू) या चिभालय् आतक्क सिंयागु हे यःसि तया तःगु दु । चैत्यया यःसिप्रतिकात्मक अर्थ थी थी कथं ज्याना तःगु दु ।

क) बोधि वृक्ष - साँची स्तुपथँ जाःगु अशोककालीन स्तुपय् स्वचाः ग्वःलागु चक्रावली तया चिभाः ग्वःया द्यःने सिमा बुया वया च्वंगु कथं दयेकिगु खः । अथेहे भारतया अमरावती स्तुपय् कया तःगु लोहबुट्टाय् भन् स्पष्ट जुइक सिमाया हे आकृति कया तःगु दु । थुकि यात बोधिमण्डप (हर्मिका) स बुयावयाच्वंगु बोधिवृक्ष कथं कयातःगु दु ।

ख) सुविशुद्धधर्मधातु ज्ञानया प्रतिमूर्ति वैरोचन - पञ्चबुद्धात्मक चैत्यया अवधारणा कथं प्यम्ह बुद्ध प्यंगू दिशाय् विराजमानयाका तइगु खः थँ वैरोचन तथागत मध्यस्थानय् विज्याइम्ह खः । थुगु यःसि सुविशुद्धधर्मधातु ज्ञानया प्रतिमूर्ति वैरोचन तथागतया प्रतिकया रूपय् कयाः तःगु दु ।

७) उष्णीषचुडामणि

यःसिया च्वकाय् अर्धगोलाकार ज्याना सर्वबुद्धमहामुकुट उष्णीषचुडामणिया रूप्य् ग्वारा छगः दयेका तःगु दु । थुगु मणि (हिरा) बुद्धरत्नया प्रतिक खः । वर्माया सर्वप्रसिद्ध स्वेदगों प्यागोडाया शीर्ष स्थानय् ला ७६ क्यारेटया असली हिरा हे तथा तःगु दु । थ्व मणियात उच्चकोटिगु दर्शनज्ञानया अनुत्तर बोधिरत्न धका संज्ञा विया तःगु दु । सम्पूर्ण चैत्यया सक्षिप्त रूप थ्व धर्मकाय स्वरूप रत्न जुइगु जुया चैत्ययात चैत्यरत्न धका नं सम्बोधन यायेगु याः । चैत्य सम्बन्धी हस्तलिखित थ्यासफूस त्रयोदश भूमि तगिं निसँ उष्णीषचुडामणितक्कया समग्र विषयवस्तु यात 'शून्यताविशुद्धि उष्णीषचक्र अनुत्तरसम्येकसम्बोधि भूमि' धैगु संज्ञा विया तल । थ्व अर्थय् चैत्यया त्रयोदश भूमिं निसँ मणि तक्कया ब्वः पाखें पृथग्जन जुयाच्चैपि सत्त्वपिंस बोसिसत्त्व संवर धारणयाये धुंका निसँ सम्येकसम्बुद्धत्व प्राप्त जुइबले तक्कया मार्ग महाक्रम क्यना च्वँगु खः ।

८) छत्र

चिभाःया यःसि व उष्णीषचुडामणियात तोपुइक सुवर्णछत्रं कुइकातःगु दु । सम्पूर्ण सम्येकसम्बुद्धत्व प्राप्त यायेगु मार्गक्रम ज्ञानयात उच्च आदरसत्कार यासे मणिरत्न जडेयाना तःगु भाव दुगु बुट्टा किया तःगु सुवर्ण छत्रं कुयेका श्रीशोभायमान जुइका तःगु जुल । सद्धर्मपुण्डरिक, ललितविस्तर, महाकर्मविभङ्ग, महावस्तु आदि ग्रन्थय् चैत्यस छत्र छायेगु पुण्यं चक्रवर्ती जुइगु, सुगति प्राप्त जुइगु, निर्वाण तक्क लाभ जुइगु खँ उल्लेख जुया च्वँगु कथं चैत्यस छत्रं कुइकिगु परम्परा न्त्यानावयाच्चँगु खः । थुगु छत्र चैत्यया अभिन्न अंग मखु । दातापाखे चढेयाःथाय् जक छत्र दइगु खः । गुइतःया हे गःसि चिभालय् थुजागु छत्र मदु ।

छत्रया च्वय् च्वामुगु गजू छुना तःगु दु ।

छत्रया द्यःने हानं छगू अम्बसाहाः दयेका उकि द्यःने कलस व उकि द्यःने च्वामुसे च्वँगु मणिरत्नया आकृति दयेका तःगु दु । गजूया थुगु भाग हिन्दु वा बौद्ध न्त्यागुनं देगल्य् दइगु कथहे खः । थुकि दुगु पूर्णकलशया अर्थ ज्ञानया पूर्णता खः । उकि द्यःने दुगु मणिया अर्थ शून्यता ज्ञानयात महारत्नया पद वियातःगु खः ।

चिभाःस प्रतिस्थापित मूर्ति व अन्य कलाकृतिया वर्णन

थुगु चैत्यय् नं अन्य चिभालय् थें तुं पञ्चबुद्ध मध्ये प्यम्हबुद्धपिनिगु मूर्ति प्यकुने स्थापना याना तःगु दु । पूर्वय् अभिताभ, दक्षिणय् रत्नसम्भव, पश्चिमय् अक्षोभ्य व उत्तरय् अमोघसिद्धि निस्वनाः तःगु दु । अदभूत रूपं थ्व चैत्यय् अक्षोभ्य बुद्ध व अभिताभ बुद्धया दिशा हिइका तथा तःगु दु । थथे अक्षोभ्य बुद्ध पश्चिम दिशाय् व अभिताभ बुद्ध पूर्व दिशाय् तःगुया कारणया विषयय् विभिन्न विद्वान् पिनिगु फरक फरक धापू दु ।^{१४} अर्थ पूर्ण रूपं थुकथं दिशा हिला तःगु खः वा जीर्णोद्धारया भुवल्य् अन्जानवस थथे जूवंगु खः वा अन्य कारणं खः - थ्व विषयस स्पष्ट कारण लुइकेया लागि थप अन्वेष्टण यायेगु बाकि हे दनि । पूर्व स्वकेमाम्ह अक्षोभ्य तथागत पश्चिम स्वका तःगुया कारण वसुच्चशील महाविहारया मूल गन्धुरीदेवता अक्षोभ्य चुलंचु लाकेया लागि दयेका तःगु खःला धैगु अनुमान जक यायेफु । अक्षोभ्य स्थापना यानातःगु थुगु पश्चिम पाखेया देगःचाया प्रमुखत्व क्यनेया लागि थुम्ह अक्षोभ्यया द्यःप्वाः च्वय् पञ्चबुद्ध अकितगु लोहँया तोलं नं तयातःगु दु । थ्व वाहेक चैत्यया प्यकुने प्यंगः देगःचा दयेका थी थी बुद्ध बोधिसत्त्वपिं निस्वना तल । इसान कोण (उत्तर - पूर्व) य् पद्मपाणी लोकेश्वर, आग्नेय कोण (दक्षिण-पूर्व) य् च्वँगु मूर्ति तज्ज्यागुलिं स्पष्ट मजू,

नैऋत्य कोण (दक्षिण-पश्चिम) य् धर्मचक्र मुक्ता
बुद्ध, वायव्य कोण (उत्तर - पश्चिम) य् पद्मपाणी
लोकेश्वर निस्वना तःगु दु ।

गुइतःया बहिःविहार लिसे सम्बन्ध

गुइतःया वसुच्चशील महाविहार व गुस्तल
महाविहार निगूलिं बहीया मूल गन्धकुटीया चुल्लं
मिलेयाना छगो छगो तग्वःगु चैत्यत निर्माण याना
तःगु दु । थनया स्वँगू बहिःविहारया संरचना स्वयेबले
न्हापा वर्गाकारया छगू हे जक बही निर्माण जूगु
खनेदु । कालान्तरय् थुगु बही निगू भागय् विभाजन
जुगु व थुकि मध्यय् निगूगु ब्व नं निगू विहारया रूपय्
विभाजन जूगु स्पष्ट जू । थथे विभाजन जुइ न्ह्यो
थनयागु विहारया स्वरूपया अनुमान प्रमाण कथं
विचाःयायेबले थुगु विहार चक्कंगु चुक दया तःधिकः
जुइक दयेकातःगु कास्यमूर्ति सहितया तज्जागु देगः
दुगु गुस्तल नामं प्रख्यातगु विहार जुया च्वँगु खः ।
विभाजनं लिपा लिपांगु कालय् बच्छि विहारया ब्वयात
प्रथम श्री महाविहार नामं प्रचलित जुगु खःसा ल्यँदिनिगु
बच्छि ब्वया पश्चिमपाखेया ब्वय् निर्माण जूगु विहारया
नाँ गुस्तल महाविहार व पूर्वपाखे निर्माण जूगु विहारया
नाँ वसुच्चशील महाविहारया नामं प्रचलित जुल ।
थुकथंया विहारया विभाजन गुवले जुल धका अनुमान
जक याये फइ, तथ्य प्रमाण लुइके मफुनि । ने.सं.
३५५ या तर्धं बहिःया मू देगः दुने भविष्यव्याकरण
मुक्ता बुद्धया पादपीठया अभिलेखय् तक्क हाल धया
वयाच्वँगु प्रथम श्री महाविहार नाँ प्रचलनय् मवनिगु
सिद्ध । थुगु अभिलेखय् 'तत्र प्राच्यां दिशि गुस्तलो
नामरम्यो विहार ...' धका उल्लेख जुया च्वँगु दु (वज्राचार्य, २०५६ - पेज ६१) । हिटी फुसेच्वँगु
चिभाः व गःसि चिभा निग्वलं लिपा निर्माण जूगु
निगू विहारया चुल्लं निर्माण जुया च्वँगु जुया थुपि
चिभाः त गुस्तल महाविहार व वसुच्चशील महाविहार

निर्माण जूवले हे वा थुपिं विहार त निर्माणं लिपा
तिनि निर्माण जूगु स्पष्ट जुइ ।

थुगु धान्याराश्याकृति चैत्य (हिटी फुसे च्वँगु
चैत्य) वसुच्चशील महाविहार व गुस्तल महाविहार
निगूलिं बहीया संघ दुजः पिनि देगुद्यः (कुलदेवता) या
रूपय् मानय् याना वसपोलपिं पाखें देपुजा कुन्हु
कुलपूजादि कर्मकाण्ड न्ह्याकावयाच्वँगु दु । थुकिं
नं थ्व चिभाःया वसुच्चशील महाविहार व गुस्तल
महाविहार लिसे क्वात्तुक्क सम्बन्ध दु धैगु स्पष्ट जू ।

इतिहास व प्राचीनता

थुगु चैत्य गुवले निर्माण जुल धैगु विषय
अभिलेख प्रमाणया अभावया कारणं तिथि मिति
क्वःछिइ मफु । अथे नं थ्व चैत्यस स्थापना याना
तःगु मूर्तिकलाया शैली, लोहँया जात आदि व थ्व हे
शैली निर्माण जुया च्वँगु गःसि चिभाःस दया च्वँगु
अभिलेख पाठ पाखें निम्नानुसार छुमां कायेफु ।

१) तःगो चिभा दयेकेगु परम्परा

नेपाःया बौद्ध वास्तुकला इतिहासय् थ्व शैलीया
तग्वः चिभा दयेकेदु परम्परा प्राचीन कालय् आपालं
दुगु व मल्लकालया उत्तरार्द्धय् थुजागु चिभाः दयेकेगु
परम्परा म्हो जुयावंगु खने दु । स्वयम्भू महाचैत्य,
खास्ति चैत्य व चावहीया धन्वं चैत्य लिच्छिविकालय्
हे निर्माण जूगु खँ स्पष्ट जूसां लिच्छिवि अभिलेखे
गनं नं थुपिं चैत्य तयेगु उल्लेख खनेमदु । केवल
विहारया नाँ जक उल्लेख जुया च्वँगु दु । इतिहासकार
पिन्स थुकिया अर्थ थुकथं अनुमान याःगु दु । भारतया
विहार निर्माण परम्पराय् विहार नापं तगो चैत्य
दयेका चैत्ययात विहारया हे अभिन्न अंगया रूपय्
काइगु खः । साँची स्तुप, नालन्दा महाविहारया
संरचना आदि आपालं थुकिया उदाहरण त भिसं
खंके फु । तिवारी (२००१ पेज ६५) या धापू कथं
लिच्छिविकालय् उल्लेख जुया च्वँगु शिवदेव विहार

धैगु खास्ति चैत्य हे खः व चाविहार धैगु आः या धनूँ चैत्य स्थान हे खः । गुइतःया विहारय् लुया वःगु ई.सं ५४० या लिच्छवि अभिलेखं थन विहार निर्माणया गतिविधि लिच्छविकालय् जुइधुकुगु खँ प्रमाणित जूगु अनुसार थुपिं तग्वः चैत्य त न उवलेया विहार निर्माण परम्परानुसार उकथं हे विहारया अभिन्न अंग कथं लिच्छविकालं निसेँ हे दया वया च्वँगु धैगु अनुमान याये फु ।

२) प्रस्तर मूर्तिकला

वसुचवशील महाविहारया न्ह्योने च्वँगु थुगु चैत्यस प्रतिस्थापित पञ्चबुद्ध मूर्ति लिच्छविकालया मखुसां चैत्यया नैऋत्य कोण (दक्षिण-पश्चिम कुँ) य् च्वँगु देगःचाय् स्थापना याना तःगु मूर्ति खुगूगु शताब्दीया लिच्छविकालीन प्रस्तरकला खः । अथेहे छगूहे पहःलँ दयेका तःगु गुस्तल महाविहारया न्ह्योने च्वँगु 'गःसि चिभाः' या मूर्ति लिच्छवि शैलीया दया च्वँगु दु । थ्व बाहेक थुगु चैत्यलिसे स्वाना च्वँगु च्यागः चैत्य नं शैली कथं लिच्छवि कालया जुया च्वँगु दु । गुस्तल महाविहारया न्ह्योने दुगु गःसि चिभाःस दुगु ने.सं. ३६८ या अभिलेखं थुगु चिभाः थकुरी वंशकालय् हे निर्माण जुइ धुकुगु प्रमाण खः । ऐतिहासिक व सांस्कृतिक महत्त्व जाःगु थुगु गुइतःया तग्वः चिभाः दर्शन पूजन परिक्रमा याना ज्ञान वृद्धि पुण्य वृद्धि यायेगु उत्तम पुण्यक्रिया खः । भनी पूर्वाचाय्पिन्सं त्वता थकुगु थुजाःगु सम्पदा सम्बन्धी

सिकेगु, सयेकेगु, अनुसन्धान यायेगु व थुक्रिया संरक्षण याना सदर्म चीरस्थायी याना तथेगु कुतः दक्क सकलपिं पाखें जुइमा । चिरं तिठ्ठन्तु सदम्मो ।

रसन्दर्भ ग्रन्थ सूची

राजवंशी शंकरमान, २०२८, कान्तिपुर ओबहालटोल ओबहालबारीको शिलालेख, प्राचीन नेपाल, पुरातत्त्व विभागको मुखपत्र, अंक १६, श्रावण २०२८ (July 16 1971), पुरातत्त्व विभाग, काठमाडौं

राजवंशी, श्याम सुन्दर, २०७२, पाटन गुइतबहीको अप्रकाशित लिच्छविकालको अभिलेख, अभिलेख वर्ष ३३ पूर्णाङ्क ३३, राष्ट्रिय अभिलेखालय वज्राचार्य, हेराकाजी, २०५६, गुइतःया बहिःविहार संघ (छगू अध्ययन, दीपावती पुस्तकालय, गुइतः, यल ।

शाक्य हेमराज, २०५०, चैत्य थःगु आत्मकथा (सक्षिप्त परिचय, बेखाराज वज्राचार्य, वनवाहा, यल । Gutschow, Neils. 1997. *The Nepalese Caitya - 1500 years of Buddhist Votive Architecture in the Kathmandu Valley*. Lumbini International Research Institute.

Regmi, D.R., 1966. *Medieval Nepal Part IV*, author, Patna

Snodgrass, A. 1992. *The symbolism of Stupa*, Motilal Banarasidass, Delhi

Tiwari, S.R., 2001, *The Ancient Settlements of the Kathmandu Valley*. CNAS, TU.

Tucci Giuseppe, 1932. *Stupa: Art, Architecture and Symbolism*, Aditya Prashan Delhi.

पाद टिप्पणी

^१ मूल देगः पुनःनिर्माणया इवल्य मूल गन्धुरी देवताया पाद पीठया ल्यूलेया भागय् लुयावःगु लिच्छविकालीन अभिलेखय् लिच्छवि सम्वत ४६४ (अर्थात् ई.सं. ५४०) उल्लेख जुया च्वँगु दु ।

^२ ने.सं. ७६० या काठमाडौं ओम्बहाल स्थित शिलालेख (राजवंशी, २०२८)

^३ ने.सं. ७५७ या क्वावहालया अभिलेख (Regmi, 1966 pg 69)

^४ ने.सं. ६५६ या सुवहाल अभिलेख (Regmi, 1966pg 3)

^५ ने.सं. ६६६ या सुवहाल अभिलेख (Regmi, 1966 pg 6)

^६ ने.सं. ७३५ या यनमुगल, पाटनया अभिलेख (Regmi, 1966 pg 55)

^७ पं. अमृतानन्द वन्द्यजुं वेलायतया विद्वान् ब्रायन हडसनयात ने.सं. ५३५ स च्वयाः ब्युगु धर्मकोष संग्रहः स थी थी आकार प्रकाशया आधारय् चैत्ययात ४४ थी कथं वर्गीकरण याइगु खँ उल्लेख जुगु दु । (शाक्य हेमराज, २०५० पेज ४८)

^८ हाल थुपिं मध्ये निगः चैत्य खुया यंके धुंकुगुलिं न्हुगु चैत्य पुनर्स्थापन याना तःगु दु ।

^९ 'धातु गर्भ' धाःगु थ्वहे खँग्वः अपभ्रंश जुया श्रीलंकाय् डागोवा धायेगु यात । अनलिं अग्रेज तयेसं थुकियात प्यागोडा धायेगु यात ।

^{१०} "अनुजानामि, भिक्षवे, पञ्च लेणानि - विहारं, अ'योगं, पासादं, हम्मियं, गुहं"न्ति। विनयपिटक

- चूलवग्गोपाली - सेनासनखन्धकं २५४

अर्थ - न्याथी कथंया वासस्थान च्वनेत अनुमति विया च्वना - विहार, अध्ययोग, पासाद, हम्मिय व गुहा)

^{११} १) प्रमुदिता भूमि, २) विमला भूमि, ३) प्रभाकरी भूमि, ४) अर्चचिष्मती भूमि, ५) सुदूर्जया भूमि, ६) अभिमूखी भूमि, ७) दुरंगमा भूमि, ८) अचला भूमि, ९) साधुमती भूमि, १०) धर्ममेघा भूमि, ११) समन्तप्रभा भूमि, १२) निरूपमा भूमि, १३) ज्ञानवतीवज्रभूमि

^{१२} स्वयम्भू चैत्यया त्रयोदशभूमि वृताकारयाना दयेका तःगु खः सा हर्मिकाया च्वसँ पञ्चबुद्धया पञ्चकुल अकित हर्मिका पत्र (हलःपौ) तयातःगु दु ।

^{१३} न्यागू तगिं दुगु यात श्रावकभूमिचैत्य, न्ह्येगू तगिं दुगु यात प्रत्येकभूमिचैत्य, भिन्ध्यगू तगिं दुगु यात महायानभूमि चैत्य, भिन्स्वगू दुगुयात वज्रयानभूमि चैत्य धाई ।

^{१४} वज्राचार्य हेराकाजी (२०५६) या धापू कथं थुगु प्रकारका स्थापना स्वपूर्वया अवधारणा कथं याना तःगु खः । पूजादि कर्मकाण्डयाइबले बज्राचार्य पिन्सं थःगु न्ह्यःने लाःगु थापं याना तःगु दिशायात पूर्व मानय् याईगु खः । थ्वहे ल्याखं थुगु चैत्यया न्ह्यःने चुलंगु लागु वसुच्चशील महाविहारयात मूल अथवा पूर्वया दिशा माना याना थुकथं पूवाभिमुख जुइमाम्ह अक्षोभ्य बुद्ध पश्चिमाभिमुख याना तःगु खः । थुकथं धाये बले पूर्वदिशाया जवय् दक्षिण मानयेयाये माःगु तर थुगु चिभालय् दक्षिणाभिमुखम्ह रत्नसम्भव व उत्तराभिमुखम्ह अमोघसिद्धिया दिशा हिइका मतः । केवल अक्षोभ्य व अभिताभ बुद्धया जक दिशा हिइका तःगु खनेगु ।

मेगु धापू कथं थुगु चैत्यया निर्माण पञ्चबुद्धया सिद्धान्त बॉलाक स्थापित मजुनिवले निर्माण जुगु जुया थुकथं दिशा फरक जू वंगु खः ।

बौद्ध विहार संघ, यलया ग्वसालय् प्रकाशन जूगु 'त्रिरत्न' प्यलापौया

सफलताया कामना याना च्वना नापं

न्हूदं नेपाल सम्बत १९४० लसताय् सकल नेपाःमिं पिन्त

भित्तुना देछाना च्वना ।



ज्वेल्स बचत तथा ऋण सहकारी संस्था लि.

नःटोल, पुलचोक, ललितपुर

फोन : ५५४६८५४, ५५४६८५५

“पात्र स्वयगु” स्यनेगु यानागु जुल ।

- ५) नेपाल सरकार पाखें सरोकर पक्षनापं बिना सहलह पिकागु गुथि बिधेयेक विषयली थुगु संघपाखें कानूनी विज्ञतनापं गम्भीर सहलह याना सम्पूर्ण बहा बहियापिं नापं छलफल लिपा यलया नेपालभाषा मंका खलः, सम्पूर्ण जातीय समाज नापं सामुहीक छलफल लिपा थुगु संघया संयोजकत्वय गुथि बिधेयक बिरुद्ध संघर्ष समिति निस्वनागु जुल । नापं थुगु समितिस नेपाल भाषा मंका खलः व ज्यापु समाजया उपाध्यक्ष, ताम्राकार समाजया सचिव, खडगी समाजया कोषाध्यक्ष व प्यंगु देँ (सिकमी समाज, बाराही समाज, राजकर्णिकार समाज व शिल्पकार समाज) प्रचार प्रसार संयोजक तथा स्यस्य समाज युवा संयोजक जुया यलय नापं माइतिघर मण्डलाय विशाल जनप्रदर्शन तथा मसाल जुलुस यानागु कारणं सरकार बिधेयेक लित कायत

बाध्य जुल । नापं थुगु विरोध ज्याभ्वःस उपस्थित जुया बिज्यापिं/दिइपिं सकलसित सुभाय देछाना च्वना ।

- ६) युवा रोजगार लक्षित कार्यक्रम कथं ६ महिने चाइनिज भाषा प्रशिक्षण ज्याभ्वः यानागु जुल ।

- ७) महिला उपकमिटि, नेपाल हस्तकला महासंघ, फेल्ट एण्डोसियसनया ग्वसालय महिला पिनित फेल्ट ट्रेनिङ्ग बियागु जुल नापं थुगु प्रशिक्षण काःपि मध्ये २५ जना मयाक महिलातयत रोजगारी प्राप्त जुग जुल ।

- ८) बौद्ध विहार संघं न्ह्याका वयाच्वनागु ज्याभ्वःयात कदर यासे नेपाःदेया ल्वकं ह्वागु नापं बिश्वासिलो बैंक कुमारी बैंक पाखें थुगु संस्था पाखें न्ह्याकिगु दच्छिया ज्याभ्वःलय आर्थिक सहयोग यायेगु वचं बिया २०७६ असोज ५ गते सम्मनौता पत्रय हस्ताक्षर जुगु दु ।

बौद्ध विहार संघ, यलया ग्वसालय प्रकाशन जूगु ‘त्रिरत्न’ प्यलापौया
सफलताया कामना याना च्वना नापं
न्हूदं नेपाल सम्बत १९४० लसताय सकल नेपाःमिं पित्त
भित्तुना देछाना च्वना ।



जग्गा नाप जाँच

जग्गा खरिद बिक्रि

मालपोत सम्बन्धी सम्पूर्ण कामहरु

अद्दा अदालत सम्बन्धि सम्पूर्ण कामहरु

सम्बोधि शाक्य

बटुक भैरब, लगनखेल, ललितपुर

मो. : ९८९३५९७४७३

Illustrations, Citation and Bibliography


Addendum

गुइतःया तगवः चिभाः

यल देय्या पूर्वखे सिथय् लाःगु ऐतिहासिक महत्वं जायाच्वंगु प्राचीन थाय् गुइतः त्वाः खः । थुगु त्वालय् प्रथम श्री महाविहार, वसुच्चशील महाविहार व गुस्तल महाविहार नाँया स्वंगू मूल बहिःत छथासं दया थःथःगु हे संघ व्यवस्था दया च्वंगु लगायत अनेक विशेषतां जाःया च्वंगु दु । संक्षिप्तं थुपिं विशेषतात थुकथं दु ।

१. धँल्याः हिटी व गुइतः अजी - गुंला पर्वया अवसरय् बहिःद्यः ब्वयेगु परम्परानुसार थन त्वालय् धँल्याः हिटी व गुइतः अजीया प्रतिमा ब्वया तइगु दु । गुकि यात आपालं श्रद्धालुपिन्सं भाद्र कृष्ण प्रतिपदा कुन्हु थन वया दर्शन व पूजन याःवयेगु यानावयाच्वंगु दु ।
२. तुलाँ पौ - दीपंकर तथागत प्रमुख भिक्षुसंघ विज्याका सर्वानन्द जुजुं दीपावती नगरय् सम्यक् दान पञ्जदान न्यायेकुगु बाखँ दुथ्याना च्वंगु सर्वानन्द नृप जातक चित्रित ३६ फिट हाकःगु तुलाँ पौ बहीद्योः ब्वयेगु भुवलय् ब्वयेगु यानावयाच्वंगु ।
३. पञ्जदान पर्व - पञ्चाष्टमीया दिनस पञ्जदान न्यायेका हनेगु परम्परा दकले न्हापां शुभारम्भ जूगु थाय् या रूपय् प्रसिद्धगु ।
४. गुंगु अंक लिसे संयोग - थुगु त्वाः गुंगु तला दुगु देगः, गुधाः हिटी, गुंगु तुं आदि गुंगु अंक मिलय् याना धर्मकिर्ति त निस्वना तःगुलिं 'गुस्तल' धका नामाकरण जुया च्वंगु ।
५. बुद्ध मूर्ति - नेपाःया बहा बहिःस स्थापना याना तःगु क्वापाःद्य, गन्धुरीदेवताया मूर्ति त मध्ये दक्खसिवे तःधिकःगु बुद्ध मूर्ति निस्वना तःगु ।
६. सर्वप्राचीन अभिलेख - यल देशय् दुगु बहाःबहिःस दया च्वंगु अभिलेखत मध्ये दक्खसिवे पुलांगु शिलाभिलेख^१ दुगु बहिः प्रथम श्री महाविहार जुया थुगु बहिः ऐतिहासिक प्रमाणया आधारय् हालया लागि सर्वप्राचीन बहिः जुया च्वंगु दु । (राजवंशी, २०७२, पेज - ७४)

थुजाःगु हे अनेक विशेषतां जाया च्वंगु थुगु त्वालय् निस्वना तःगु थी थी धर्मकिर्ति त मध्ये वसुच्चशील महाविहारया चुलंचु च्वंगु तःगो चिभाः (धान्याराश्याकृति चैत्य - हिटी फुसेच्वंगु चिभाः) व गुस्तल महाविहारया चुलंचु च्वंगु तगवः चिभा (वेदिकोपरिस्वयम्भू चैत्य - गःसि चिभाः) नं खः (शाक्य, २०५० पेज-४८)। थुपिं मध्यय् हिटीफुसय् च्वंगु चैत्यया ऐतिहासिक सांस्कृतिक महत्त्व व चैत्य वास्तुकलाया म्हासिका थन न्ह्यथनागु दु ।



चित्र १ - गुइतः त्वाःया नक्सा



चित्र - २ गुइतःया हितिफुसय् च्वंगु तग्वः चिभा: (धान्याराश्याकृति चैत्य)

स्तुप - चैत्य - चिभा:

बौद्ध वास्तुकला धायेबले प्रमुखतः विहार व स्तुप वा चैत्य न्त्योने वइ । विहार बुद्ध सहित भिक्षुसंघ च्वनेत दयेका तइगु आवास खः । थें स्तुप व चैत्य बुद्ध व बुद्धज्ञानया प्रतिक स्वरूप पूजा, ध्यान व प्रशिक्षणया लागि निर्माण याइगु वास्तुकला खः । गुकि विहारय् थें दुने वना निवास यायेगु याइ मखु । स्तुप व चैत्य दयेकेगु परम्परा बुद्ध सिवे यक्व न्हापां निसैं हे दुगु खः । अथेहे बुद्धकालय् बुद्धया अस्थिधातु, केशधातु, दन्तधातु गर्भय् तथा चैत्य दयेकुगु प्रसंग थन उल्लेखनीय जु । बौद्ध वाङ्मयय् चैत्य प्यथी कथं ब्वथलातःगु दु ।

१. शारीरिक चैत्य - भगवान बुद्धया शरीरया अस्थि अथवा अन्य धातु गर्भय् तथा दयेका तइगु,
२. परिभोग चैत्य - भगवान बुद्धं प्रयोग याःगु वस्तु गर्भय् तथा दयेका तइगु,
३. उद्देश्य चैत्य - लोकय् पुण्य अभिवृद्धि यायेगु पवित्र उद्देश्यं श्रद्धालुपिन्स दयेकिगु,
४. धर्म चैत्य - धर्म संग्रहयाःथाय्, संयायन याःथाय् उकिया संस्मरणया रूपय् दयेकिगु वा अमूल्य धर्मस्कन्ध गर्भय् तथा दयेकिगु

नेपालय् हाल स्तुप, चैत्य व चिभाः पर्यायवाची कथं छ्यलेगु याः । यद्यपि थुपिं खँग्वःतय् दथुइ छुं भेद दु । थुकियात छको दुवाला स्वये ।

स्तुप - 'स्तुप' खँग्वःया अर्थ इतिहास कालक्रमानुसार थी थी कथं दु । उपिं मध्यय् अस्थिधातु तथा चा व लोहं दोमुना दयेकिगु द्वं यात बुद्धकालय् 'थुवे' धाइगु खः । उथेंहे जाःगु द्वंयात नेपालय् 'थुवे' खँग्वः अपभ्रंश जुया 'थुर' धका धयावयाच्चंगु दु । थ्व थुवे यात संस्कृतं स्तुप धाइगु खः । नेपालय् यलया प्यंग थुर वाहेक द्वक्व थजागु वास्तुकलायात चैत्य हे धका सम्बोधन यानावयाच्चंगु दु । स्वयम्भू महाचैत्ययात स्तुप धका सम्बोधन गनं याना तःगु मदु । अंग्रेज लेखकपिन्स जक स्तुपा धका प्रयोगय् हःगु खः । उकिं नेपाःया सन्दर्भय् यलया प्यंग थुर जक स्तुप खः । बाकि दक्कं चैत्य खः ।

चैत्य - चैत्यया अर्थ दुवाला स्वयवले पं हेमराजं (२०५०) स्वथी कथं न्त्यवया तःगु दु ।

- क. 'चित्त चैतन्य चैत्य' - स्वयम्भू पुराणस दुथ्याना च्वंगु शाक्यमुनि बुद्धं श्री स्वयम्भू महाचैत्य दर्शन याःविज्यावले याःगु स्तुति वाक्यस चैत्ययात 'नैराकारं निरञ्जनं गगनवदनिशं चित्त चैतन्य चैत्यं' अर्थात् आकाश समान जुया छुं आलम्बनलिसे लिप्त मजुगु प्रभाश्वरथें सर्वदा प्रकाशमान जुयाच्चंगु सदाकालं जागृतगु चैतन्य स्वरूप चित्त हे चैत्य खः धका परिभाषित याना तःगु दु ।
- ख. 'चिताया वस्तु' - बुद्ध बोधिसत्वपिनिगु शरीरयात विधिवत् आदहनोत्सव अग्नि संस्कार यायेधुंका ल्यंदैगु अस्थिधातु अर्थात् चित्तिवस्तुयात नं 'चैत्य' धाई । थुजागु चित्तिवस्तु संग्रहयाना अनुयायीपिन्स भविष्य पर्यन्त वसपोलपिनिगु गुण लुमंका गौरव तयेगु, धर्म संवेग उत्पन्न जुइकेया लागि स्थापना याइगु स्मारकयात नं 'चैत्य' धका धाई ।
- ग. बुद्धया पुण्यकिर्तिया संग्रह - भगवान बुद्धया गुलिनं पुण्य किर्ति दु, उगु सम्पूर्ण कुशलमूल संग्रहयात नं चैत्य धका धया तःगु जुल ।

समग्रय् स्वयवले बुद्ध ज्ञानया प्रतिक कथं धर्म संवेग उत्पन्न यायेगु निमित्तया रूपय् प्यंगू संवेजनीय स्थल (बुद्ध जन्मस्थल, ज्ञान लाभ याःगु थाय्, धर्मचक्र प्रवर्तन याःगु थाय् व महापरिनिर्वाण जूगु थाय्) लगायत मनतय्गु वस्ती नगरया थाय् थासय् दयेका तइगु धर्मया चिं यात हे चैत्य धका थुइकेमा ।


नेपाःयागु सन्दर्भय् नेपालमण्डलया बौद्ध संस्कृतिया मुक्कं आधार स्वयम्भू धर्मधातुवागिश्वरया ज्ञान जुयाच्चंगु जुया नेपाया दक्कं चैत्य आदिबुद्ध धर्मकाय स्वरूपगु स्वयम्भू महाचैत्ययागु हे प्रतिलिपि कथं दयेका तइगु खः । उकिंजुया नेपाल मण्डलस दयेका तइगु दक्क चैत्यय् निम्नानुसार लक्षण प्रमाण अनिवार्य रुपं दया च्वनी ।

१. **नागहृदया प्रतिक** - नागहृदया प्रतिक स्वरूप नागो नं धिरेयाना तइ । अन्यथा लः या प्रतिनिधित्व जुइगु अन्य वस्तु आकृति दयेका तइ ।
२. **पलेस्वाँ** - अनं च्वय् सहस्रदल पलेस्वाँ स्वरूप पद्मावली
३. **चैत्य ग्वः** - पलेस्वाँ नं उत्पन्न जूगु ज्योतिरूपयात तोपुया तःगु चैत्य ग्वः ।
४. **मिखा व उर्णा च्वया तःगु हर्मिका**,
५. **नेपाःया मौलिक शैलीया गजू** - त्रयोदश भूमि तगिं, यष्टिमूल व ज्योतिरूप स्वरूप उष्णीष चुडामणि सहितगु गजू

चिभाः - विभिन्न थाय् थासय् प्रतिष्ठापित जुया च्वंगु चैत्य चिभाःया स्थापना सम्बन्धी अभिलेखय् उल्लेख जुया च्वंगु खंग्वःत व उकिया विकासक्रमयात विचाःयाना स्वय् वले 'चिभाः' खंग्वःया व्युत्पत्ति सम्बन्धी निगू कथंया धारणा कायेमाःगु खनेदु ।

क. **'चैत्य विहार'** - 'चिभाः' खंग्वः 'चैत्य विहार' धैगु संस्कृत खंग्वलं वःगु खः । थी थी प्राचीन मध्यकालीन शिलालेखय् 'चैत्य विहार', 'चैत्य वाहार', 'चितु वहार', 'चैते वाहार'ⁱⁱ धैगु खंग्वः छ्यलेगु याना च्वया च्वंगु दु । थथे 'चैत्य' व 'विहार' निगू खंग्वः स्वाना छगू हे खंग्वः कथं छ्यलेगु याःगुया निगू कारण जुइफुगु अनुमान दु ।

१. **चैत्य विहारया अभिन्न अङ्ग** - प्राचीनकाय् चैत्य विहारया अभिन्न अङ्ग कथं दयेकीगु जुया चैत्य विहार खंग्वः नाप नापं प्रयोग जूगु खनेदु ।
२. **विहारया आकृति कथं दयेका तःगु प्यकुंलाःगु संरचनाय् चःने दिका तःगु चैत्य** - हानं शैली कथं विचायाना स्वयवले स्वयम्भू, खास्ति थें जाःगु चैत्यया गर्भगृह गुम्बज जक तग्वः जुइक दयेका तइगु यात अप्पोयाना चैत्य वा महाचैत्य जक धाइगु खःसा निगू तला, स्वंगु तला छें थें जाःगु चतुष्कोणाकार आधार तया उकि चःने तिनि चैत्यया ग्वः दिका तइगु शैली यात 'चिभाः' धायेगु याःगु खनेदु । गुम्बजाकार स्तुपया क्वय् या आधार



चित्र नं. ३ गुस्तल महाविहारस दुगु शिखरकूट चैत्य (किपा साभार- Gutschow 1997)

एक तले, बहुतले संरचना विहारया आकृति खः । थुकिइ लुखा, भ्याः, पौ, धलिं आदिया आकृति किया तःगु दै । थुकथं विहारया आकृतिया द्यःने स्वयम्भूया स्तुपाकार ग्वः दिका चैत्य व विहारया संयुक्त स्वरूप जुया च्वंगु जुया थुकियात चैत्य विहार धायेगु याःगु खः । थ्व हे शब्द अपभ्रंस जुया 'चि बाहाः' जुल । हानं 'चि बाहा' खँग्वः 'चिभाः' जुवंगु खः।

ख. 'चैत्य भट्टारक' - चैत्यया प्रतिष्ठा सम्बन्धी विभिन्न थासय् दया च्वंगु शिलाभिलेखय् 'चैत्य भट्टारक'ⁱⁱⁱ, 'चैत्र भट्टारक'^{iv}, 'चैते भदाद'^v, 'चैत्र भण्ड'^{vi} आदि प्रयोग जुयाच्वंगु खनेदु । 'चैत्य भट्टारक' खँग्व हे अपभ्रंश जुया लिपा 'चिभाः' जुगु खः धैगु नं विज्ञपिनिगु धापू दु ।

गुइतःया हितिफुसय् च्वंगु तग्वः चिभाःयात नं चिभाः हे धाइगु खः यद्यपि थ्व स्वयम्भू, खास्ति चैत्यया पहःया खः । उकिं थ्व चिभाःया सन्दर्भय् क.२ कारण मिले मजू । क.१ वा ख. या कारण जक सम्भव दु ।

गुइतः तग्वः चिभाया भौतिक स्वरूपया वर्णन

वसुच्चशील महाविहार चिधँबहिःया पूर्वखे, बहिःलिं पिने गन्धुरीदेवताया चुलंचु यानाः दयेकातःगु तग्वः चिबाहाः वास्तुकला व प्राचीन मूर्तिकलाया छगू महत्वपूर्ण उदाहरणया कथं धस्वाना च्वंगु दु । थुगु चैत्यया दक्षिणपाखें सत्तिक गाःहिटी दु उकिं थ्व चिभाः यात हितिफुसे च्वंगु चिभाः धका म्हसिके फु । अथेहे गुइतः पुखू, तधिकम्ह गणेद्यः, चिधिकम्ह गणेद्यः, लाय् ब्वः आदि थुगु चिभाःया जवखंवया महत्वपूर्ण वस्तुत खः । थुगु चैत्यया शैली कथं थुकियात धान्याराश्याकृति चैत्य^{vii} धका उल्लेख याना तःगु दु । थुगु तःगः चिभा मुक्कं गुंग चैत्यं युक्त जुया नवचैत्यया संयुक्त स्वरूप जुयाच्वंगु दु । गथे धासाः थुर थें आकार जुयाच्वंगु तग्वगुः मूल चैत्य - १ ग, थुगु तग्वःगु चैत्यया अण्डभाग लिसे प्यपुना च्वंगु प्यंगु दिशाय् निर्माण याना तःगु पञ्चबुद्धया देगःया गजूया रूपय् फुसे निस्वनाः तःगु प्यंगः लिच्छिवि चैत्य^{viii} (थुगु शैलीया चैत्ययात अशोक चैत्य धका नं म्हसिका वया च्वंगु दु) - ४ ग, व तग्वःगु चैत्यलिसे भचा तापाक्क प्यंगु कोणय् दयेकातःगु प्यंगः देगःचाया शीर्ष स्थानय् तया तःगु प्यंगः लिच्छिवि चैत्य - ४ ग याना मुक्कं गुंग चैत्यया कलापूर्ण संयोजन थुकि जुया च्वंगु दु । तग्वःगु चैत्य एवं मेगु देगःचात दक्कं १ फिट जाःगु फलय् दिका तःगु दु । चैत्यया थुगु फः चैत्य परिक्रमा यायेत गाक्क थाय् छिंका दयेका तःगु दु । चैत्य परिक्रमाया भवलय् माने चाहिकेत चैत्यया छचाखेरं ॐ मणिपद्मे हुँ या षडक्षरी मन्त्र लिखित माने नं तया तःगु दु । थुगु चैत्ययात क्वं निसे च्वयेतक्क स्वया वनेवले थी थी तगिं तगिं याना थुगु चैत्य निर्माण जुया च्वंगु दु । थुपिं तगिं तयेगु वारे छसि कथं वर्णन थुकथं न्ह्यथना च्वना ।

१. **चिभाः फः** - मूल चिभाःया दक्कसिवे क्वय्या तगिं २ फिट जाःगु वृताकारगु फः खः । थुगु वृताकार फःयात संस्कृत भाषं 'वेदिका' धकाः धाई । वेदिका नं नाःगोया द्यःने दिका तःगु थें याना दयेका तःगु दु । नाग धैगु लः या प्रतिक खः ।

२. **ग्वः (अण्ड)** - वेदिकाया च्वसँ पद्मावली स्वरूपं प्यो व उकिया द्योने नाःगो दयेका उकिं च्वय् चिभाःया अर्धगोलाकार 'ग्वः' अर्थात् 'अण्ड' (संस्कृत भाषं) दयेका तःगु दु । थुगु गुम्बज करिव १३ फिट जाः याना दयेका तःगु दु । थ्व गुम्बज बुद्धकाल व बुद्ध सिवे न्हापां निसे प्रचलनय् दुगु अस्थि वा अन्य वस्तु दुने तया लोहं वा चा द्रुं मुंका दयेकिगु 'थुवे' या स्वरूप खः । 'अण्ड' या अर्थ 'बीज' खः । थुगु 'खें' स दुने द्वक्क संसार न्ह्यथना च्वंगु दुसा थ्व 'खें' हे संसार नं खः । थुगु ग्वः यात विभिन्न बौद्ध साहित्यय् 'गर्भ', 'हिरण्य गर्भ', 'गर्भगृह' धका नं धया तःगु दु । थुकिया

हे कारणं चैत्ययात 'धातु गर्भ'नै धायेगु याः। थ्व कथं चिभाःया ग्वः संसार व निर्वाणया संयुक्त रूपया प्रतिक खः । उकिं ग्वः या गोलाकार पिण्ड संसार खः सा उकिया केन्द्र विन्दु तथागत गर्भया प्रतिक खः । थ्व हे तथागत गर्भयात विभिन्न सन्दर्भय् धर्मकाय, बोधिचित्त, आलय विज्ञान, बुद्ध गर्भ, सुगतगर्भ धका नं धायेगु याः । उकिं थुगु गर्भगृहयात चैत्य गर्भ धका नं धाई । थुगु ग्वः दिका तःगु फ्यो व नागो बाँलुगु तगिं पद्मावली अर्थात् पलेहःया प्रतिक खः । पलेहःया अर्थ, अलिप्तता वा पवित्रता खः । पलेहःया छःने दिका तःगुया अर्थ (सुविशुद्धगु, सम्पूर्ण क्लेशपाखें अलग्ग जुया च्वंगु अमूल्य महारत्न जुयाच्वंगु सारतत्व सुरक्षित जुयाच्वंगु धैगु खः (शाक्य २०५०, पेज २८) । माध्यमिक दृष्टि स्वयेवले शून्यता ज्ञान कथं संसार व निर्वाणय् छुं भेद खनि मखु । थुजागु हे सुविशुद्ध धर्मधातु ज्ञानकाय धर्मकाय स्वरूपगु चैतन्यया प्रतिक स्वरूप चैत्यया ग्वः दयेकातःगु खः । (Snodgrass, 1992)

३. 'चकू' वा 'हर्मिका' - गुम्बजया छःने निगः मिखा व उर्णा च्वयातःगु वर्गाकारगु चकूः (संस्कृत भाषा 'हर्मिका' धका धाई, गनं थुकियात 'गला' धका नं धाई) दयेका तःगु दु । प्राचीन अशोककालीन स्तुपस अण्डया छःने यःसि पिहाँ वया च्वनिगु व उकियात छचाखेरं वालचिना (Fence) तइगु कथंया संरचना दयेकिगु खः । थ्वहे संरचना लिपा विकासक्रम लिसे थुकथं वर्गाकार संरचना दयेकेगु यात । नेपालमण्डलय् दुगु मेमेगु चैत्यय् नं हर्मिकाया शैली सादा कथं जक दयेका उकि मिखा व उर्णा च्वया तइ । बुद्धकालया शब्द हम्मिय^x, हर्म्य अर्थात् धिरेयानातःगु थाय् धैगु शब्द हे संस्कृत भाषय् हर्मिका जू वःगु खः । चैत्यया विकासक्रमया भवलय् थुकियात थी थी कथंया प्रतिक स्वरूप दयेकेगु यात । उकि मध्ये हर्मिका बोधिमण्डप अर्थात् बोधिज्ञान लाभ याना विज्याःगु आसन गुगु स्थानं ज्ञानया ज्योति दक्व दिशाय् प्रसारित जुल। थ्वहे कारणं हर्मिकाया छोने बुद्धभूमि बोधिसत्व भूमि रूपी भिन्स्वतगिं दिका तःगु जुल । अथेहे प्यंगू दिशाय् मिखा च्वयेगु प्रचलन नेपाःया मौलिक परम्परा कथं नेपालय् न्ह्यात गुगु लक्षण नेपाली चैत्यया म्हासिका जू वन । हर्मिकास च्वया तइगु मिखा बुद्धया मिखा खः गुकियात 'वज्रदृष्टि' धका धाई (Gutschow, 1997)। थुपिं प्यंगू दिशाय् च्वया तइगु मिखा वैरोचन बुद्धया संस्मरणकथं बुद्धया ज्ञानचक्षुं सर्वत्र भुवनय् सुदृष्टिं स्वयाच्वंगु धैगु अर्थ जुल।

निगः मिखाया दथुइ जवं तुइकातःगु सँ अर्थात् 'उर्णा' च्वयातःगु दु । भगवान बुद्धया स्वीनिता महापुरुषलक्षण मध्ये कपालय् दइगु 'उर्णा' छगू नं खः । ललितविस्तर ग्रन्थय् उल्लेख जू कथं थुगु उर्णा रश्मी पिहावया मारचक्रयात नष्टयाःगु प्रसंग कथं थुगु उर्णा बुद्धया उगु मारजित रश्मीया प्रतिक नं खः । थुकियात तिलकरश्मी व गभस्तिमाला धका नं धाई ।

४. त्रयोदश भूमि तगिं^{xi} - हर्मिकाया छःने नं नाःगो, फ्यो आदि तया उकिया छःने त्रयोदश भूमीया प्रतिक कथं वर्गाकारगु भिन्स्वंगू तगिं दयेका द्यतनातःगु दु । प्रत्येक तगिं क्वय्या सिवे च्वय्या तगिं भचा भचा चिधँ याना दयेका तःगुलिं थुगु भाग त्वाथः थे जुया गजू थें आकार जुया च्वामुया वनाच्वंगु दु। गुइतःया निगोलं चैत्यया त्रयोदश भूमि खास्ति चैत्यया पहः वयेक वर्गाकार याना दयेका तःगु दु । उकि थें हे हलःपौ रहित जुया च्वंगु दु।^{xii} नेपालमण्डलय् प्रतिष्ठापित चैत्यस थी थी कथं थुपिं भूमि तया दयेकिगु परम्परा दु । न्यागू, न्हेगू, भिन्छगू, भिन्स्वंगू तगियांना दयेका तइगु मध्ये गुइतःया थुगु चिभाः भिन्स्वंगू तगियांना दयेकातःगु जुया थुकियात

वर्गीकरण कथं वज्रयानभूमि चैत्य धका धाङ्गु जुल^{xiii} । (शाक्य, २०५० - पेज १४, Gutschow 1997 pg 23) योगदर्शन अभ्यासय् छसिंकथं पारजुया वनाच्चंगु जुया थुकियात धर्मपारङ्गतभूमि धका नं धाङ्गु । थुकिइ नियमानुसार मार्गफलय् क्रमशः प्रतिष्ठित जुजुं वना बुद्धत्व प्राप्त यायेगु महाअनुक्रम क्यना च्वंगु खः गुकियात बुद्धयान धका धाङ्गु । थुपिं मध्यय् क्वं निसैं न्यागू तगिं तक्कयात श्रावक भूमि खः, अनं च्वय् गुंगुगु तगिं तक्क प्रत्येकभूमि खः, अनं च्वय् भिगूगु तगिं तक्क महायानभूमि खः सा अनं च्वय् भिन्स्वंगुगु तगिं वज्रयानभूमि खः ।

५. **अम्बसाहा:** - त्रयोदश भूमि तगिंया च्वसं छगः पादशीला तया उकिया द्यःने क्यरावाय्मो तया तःगु दु । थुगु वाय्म्वः अम्बः माः चिना दयेका तःगु थें आकृति ज्याना दयेकातइगु जुया थुकियात 'अम्बसाहाः' वा 'अम्बः' वा संस्कृतं 'आमलक' धका धाङ्गु । थुगु आकृति हिन्दु वा बौद्ध देगः न्ह्यागुगुलि नं गजूया क्वसं दयेका तई । उलिजक मखु परम्परागत बुद्धा कियातःगु थां स्वल धासां नं थजाःगु अम्बसाहाःया आकृति तयातःगु खने दै । प्राचीनकालय् अशोक स्तम्भया छ्योः (capital) या छगू भागया रूपय् दयेकेगु चलन जूगु खः । नेपाःलय् नं शुरूशुरूया लिच्छिवि चैत्य (अशोक चैत्य)य् गजूलिइ थथे अम्बःसाहा तयेगु चलन मदु वरू चैत्यया क्वय् पाखेया भागय् कियातइगु थांया आकृतिइ थांया छ्योया रूपय् अम्बसाहा प्रयोग जुया च्वंगु दु (उदाहरणः आल्को हिटीया अशोक चैत्य, Gutschow 1997 pg 144)। विकासक्रमया भवलय् लिपा लिच्छिवि चैत्यय् व वयां लिपाया चैत्यय् थुगु अम्बसाहाः चिभाः वास्तुशैलीया अनिवार्य लक्षण कथहे त्रयोदश भूमि तगिंया च्वसं तयेगु याना वयाच्चंगु दु । अम्बःसाहाया थुगु आकृति बुद्धत्वया तेजं थिना च्वंगु सूर्यया प्रतिक कथं तइगु खः । नेपाःया चैत्य सम्वन्धी हस्तलिखित ग्रन्थय् थुगु अम्बसाहाः अथवा केरावायेम्बः यात आष्फानकविशुद्धी धका संज्ञा विया तःगु दु (Gutschow, 1997 pg 23) । भगवान् बुद्धं खुदंतक याना विज्याःगु दुष्करचर्याया क्रमय् आष्फानक योग याना विज्याःगु खः । उकिं दुष्करचर्या पाखें पुला वना प्राप्त जूगू बोधिज्ञानया प्रतिक कथं थुकियात आष्फानकविशुद्धी धाःगु खः ।

६. **यःसि (यष्टिका)** - अम्बसाहाःया च्वसं सियागु थां थे जाःगु आकृति थहाँ वयाच्चंगु दु । गुकिया 'यःसि', 'यष्टि', 'यष्टिका', 'यूप', 'यष्टिमूल' आदि विभिन्न खँग्वलं म्हसिकावयाच्चंगु दु । थुगु यःसिं चैत्यया जगं निसैं थहाँ वया च्वंगु खः । स्वयम्भू, खास्ति, गुइतः, पिम्वाहा, दौवहा, यट्खावाहा, सिंहवाहा, चिलंच्ववाहा (किपू) या चिभालय् आतक्क सियागु हे यःसि तया तःगु दु । चैत्यया यःसि प्रतिकात्मक अर्थ थी थी कथं ज्याना तःगु दु ।

क. **बोधि वृक्ष** - साँची स्तुपथें जाःगु अशोककालीन स्तुपय् स्वचाः ग्वःलागु चक्रावली तया चिभाः ग्वःया द्यःने सिमा बुया वया च्वंगु कथं दयेकिगु खः । अथेहे भारतया अमरावती स्तुपय् किया तःगु लोहबुद्धाय् भन् स्पष्ट जुइक सिमाया हे आकृति किया तःगु दु । थुकि यात बोधिमण्डप (हर्मिका) स बुयावयाच्चंगु बोधिवृक्ष कथं कयातःगु दु ।



ख. **सुविशुद्धधर्मधातु ज्ञानया प्रतिमूर्ति वैरोचन** - पञ्चबुद्धात्मक चैत्यया अवधारणा कथं प्यम्ह बुद्ध प्यंगू दिशाय् विराजमान याका तइगु खःथें वैरोचन तथागत मध्यस्थानय् विज्याइम्ह खः । थुगु यःसि सुविशुद्धधर्मधातु ज्ञानया प्रतिमूर्ति वैरोचन तथागतया प्रतिकया रूपय् कयाः तःगु दु ।

७. **उष्णीषचुडामणी** - यःसिया च्चकाय् अर्धगोलाकार ज्याना सर्वबुद्धमहामुकुट उष्णीषचुडामणिया रूपय् ग्वारा छगः दयेका तःगु दु । थुगु मणि (हिरा) बुद्धरत्नया प्रतिक खः । वर्माया सर्वप्रसिद्ध स्वेदगों प्यागोडाया शीर्ष स्थानय् ला ७६ क्यारेटया असली हिरा हे तया तःगु दु । थ्व मणियात उच्चकोटिगु दर्शनज्ञानया अनुत्तर बोधिरत्न धका संज्ञा विया तःगु दु । सम्पूर्ण चैत्यया संक्षिप्त रूप थ्व धर्मकाय स्वरूप रत्न जुइगु जुया चैत्ययात चैत्यरत्न धका नं सम्बोधन यायेगु याः । चैत्य सम्बन्धी हस्तलिखित थ्यासफूस त्रयोदश भूमि तगिं निसैं उष्णीषचुडामणितक्कया समग्र विषयवस्तुयात 'शून्यताविशुद्धि उष्णीषचक्र अनुत्तरसम्येकसम्बोधि भूमि' धैगु संज्ञा विया तल। थ्व अर्थय् चैत्यया त्रयोदशभूमिं निसैं मणि तक्कया ब्वः पाखें पृथग्जन जुयाच्वंपि सत्वपिंस बोसिसत्व संवर धारणयाये धुंका निसैं सम्येकसम्बुद्धत्व प्राप्त जुइबले तक्कया मार्ग महाक्रम क्यना च्वंगु खः ।

८. **छत्र** - चिभाःया यःसि व उष्णीषचुडामणियात तोपुइक सुवर्णछत्रं कुइकातःगु दु । सम्पूर्ण सम्येकसम्बुद्धत्व प्राप्त यायेगु मार्गक्रम ज्ञानयात उच्च आदरसत्कार यासे मणिरत्न जडेयाना तःगु भाव दुगु बुद्धा किया तःगु सुवर्ण छत्रं कुयेका श्रीशोभायमान जुइका तःगु जुल । सद्धर्मपुण्डरिक, ललितविस्तर, महाकर्मविभङ्ग, महावस्तु आदि ग्रन्थय् चैत्यस छत्र छायेगु पुण्यं चक्रवर्ती जुइगु, सुगति प्राप्त जुइगु, निर्वाण तक्क लाभ जुइगु खं उल्लेख जुया च्वंगु कथं चैत्यस छत्रं कुइकिगु परम्परा न्ह्यानावयाच्वंगु खः । थुगु छत्र चैत्यया अभिन्न अंग मखु । दातापाखे चढेयाःथाय् जक छत्र दइगु खः । गुइतःया हे गःसि चिभालय् थुजागु छत्र मदु ।

छत्रया च्वय् च्वामुगु गजू छुना तःगु दु । छत्रया द्यःने हानं छगू अम्बसाहाः दयेका उकि द्यःने कलस व उकि द्यःने च्वामुसे च्वंगु मणिरत्नया आकृति दयेका तःगु दु । गजूया थुगु भाग हिन्दु वा बौद्ध न्ह्यागुनं देगलय् दइगु कथंहे खः । थुकि दुगु पूर्णकलशया अर्थ ज्ञानया पूर्णता

खः । उकि छःने दुगु मणिया अर्थ शून्यता ज्ञानयात महारत्नया पद वियातःगु खः ।



चिभाःस प्रतिस्थापित मूर्ति व अन्य कलाकृतिया वर्णन

थुगु चैत्यय् नं अन्य चिभालय् थें तुं पञ्चबुद्ध मध्ये प्यम्ह बुद्धपिनिगु मूर्ति प्यकुने स्थापना याना तःगु दु । पूर्वय् अभिताभ, दक्षिणय् रत्नसम्भव, पश्चिमय् अक्षोभ्य व उत्तरय् अमोघसिद्धि निस्वनाः तःगु दु । अद्भूत रूपं थ्व चैत्यय् अक्षोभ्य बुद्ध व अभिताभ बुद्धया दिशा हिइका तथा तःगु दु । थथे अक्षोभ्य बुद्ध पश्चिम दिशाय् व अभिताभ बुद्ध पूर्व दिशाय् तःगुया कारणया विषयय् विभिन्न विद्वान् पिनिगु फरक फरक धापू दु ।^{xiv} अर्थ पूर्ण रूपं थुकथं दिशा हिला तःगु खः वा जीर्णोद्धारया भ्बलय् अन्जानवस

थथे जूवंगु खः वा अन्य कारणं खः - थ्व विषयस स्पष्ट कारण लुइकेया लागि थप अन्वेषण यायेगु बाकि हे दनि । पूर्व स्वकेमाम्ह अक्षोभ्य तथागत पश्चिम स्वका तःगुया कारण वसुच्चशील महाविहारया मूल गन्धुरीदेवता अक्षोभ्य चुलंचु लाकेया लागि दयेका तःगु खःला धैगु अनुमान जक यायेफु । अक्षोभ्य स्थापना यानातःगु थुगु पश्चिम पाखेया देगःचाया प्रमुखत्व क्यनेया लागि थुम्ह अक्षोभ्यया द्यःप्वाः च्वय् पञ्चबुद्ध अंकितगु लोहँया तोलं नं तयातःगु दु । थ्व वाहेक चैत्यया प्यकुने प्यंगः देगःचा दयेका थी थी बुद्ध बोधिसत्वपिं निस्वना तल । इसान कोण (उत्तर - पूर्व) य् पद्मपाणी लोकेश्वर, आग्नेय कोण (दक्षिण-पूर्व) य् च्वंगु मूर्ति तज्ज्यागुलिं स्पष्ट मजू, नैऋत्य कोण (दक्षिण-पश्चिम) य् धर्मचक्र मुद्रा बुद्ध, वायव्य कोण (उत्तर - पश्चिम) य् पद्मपाणी लोकेश्वर निस्वना तःगु दु ।

गुइतःया बहिःविहार लिसे सम्बन्ध

गुइतःया वसुच्चशील महाविहार व गुस्तल महाविहार निगूलिं बहीया मूल गन्धकुटीया चुलंचु मिलेयाना छगो छगो तग्वःगु चैत्यत निर्माण याना तःगु दु । थनया स्वंगू बहिःविहारया संरचना स्वयेबले न्हापा वर्गाकारया छगू हे जक बही निर्माण जूगु खनेदु । कालान्तरय् थुगु बही निगू भागय् विभाजन जुगु व थुकि मध्यय् निगूगु ब्व नं निगू विहारया रूपय् विभाजन जूगु स्पष्ट जू । थथे विभाजन जुइ न्त्यो थनयागु विहारया स्वरूपया अनुमान प्रमाण कथं विचाःयायेबले थुगु विहार चक्कंगु चुक दया तःधिकः जुइक दयेकातःगु कास्यमूर्ति सहितया तज्जागु देगः दुगु गुस्तल नामं प्रख्यातगु विहार जुया च्वंगु खः । विभाजनं लिपा लिपांगु कालय् बच्छि विहारया ब्वयात प्रथम श्री महाविहार नामं प्रचलित जुगु खःसा ल्यँदिनिगु बच्छि ब्वया पश्चिमपाखेया ब्वय् निर्माण जूगु विहारया नां गुस्तल महाविहार व पूर्वपाखे निर्माण जूगु विहारया नां वसुच्चशील महाविहारया नामं प्रचलित जुल । थुकथंया विहारया विभाजन गुबले जुल धका अनुमान जक याये फइ, तथ्य प्रमाण लुइके मफुनि । ने.सं. ३९९ या तधं बहिःया मू देगः दुने भविष्यव्याकरण मुद्रा बुद्धया पादपीठया अभिलेखय् तक्क हाल धया वयाच्वंगु प्रथम श्री महाविहार नां प्रचलनय् मवनिगु सिदु । थुगु अभिलेखय् 'तत्र प्राच्यां दिशि गुस्तलो नामरम्यो विहार ...' धका उल्लेख जुया च्वंगु दु (वज्राचार्य, २०५६ - पेज ६९) । हिटी फुसेच्वंगु चिभाः व गःसि चिभा निग्वलं लिपा निर्माण जूगु निगू विहारया चूलंचु निर्माण जुया च्वंगु जुया थुपि चिभाः त गुस्तल महाविहार व वसुच्चशील महाविहार निर्माण जूबले हे वा थुपिं विहार त निर्माणं लिपा तिनि निर्माण जूगु स्पष्ट जुइ ।

थुगु धान्याराश्याकृति चैत्य (हिटी फुसे च्वंगु चैत्य) वसुच्चशील महाविहार व गुस्तल महाविहार निगूलिं बहीया संघ दुजः पिनि देगुद्यः (कुलदेवता) या रूपय् मानय् याना वसपोलपिं पाखें देपुजा कुन्हु कुलपूजादि कर्मकाण्ड न्त्याकावयाच्वंगु दु । थुकिं नं थ्व चिभाःया वसुच्चशील महाविहार व गुस्तल महाविहार लिसे क्वात्तुक्क सम्बन्ध दु धैगु स्पष्ट जू ।

इतिहास व प्राचीनता

थुगु चैत्य गुबले निर्माण जुल धैगु विषय अभिलेख प्रमाणया अभावया कारणं तिथि मिति क्वःछिइ मफु । अथे नं थ्व चैत्यस स्थापना याना तःगु मूर्तिकलाया शैली, लोहँया जात आदि व थ्व हे शैलीं निर्माण जुया च्वंगु गःसि चिभाःस दया च्वंगु अभिलेख पाठ पाखें निम्नानुसार छुमां कायेफु ।

१. तःगो चिभा दयेकेगु परम्परा - नेपाःया बौद्ध वास्तुकला इतिहासय् थ्व शैलीया तग्वः चिभा दयेकेगु परम्परा प्राचीन कालय् आपालं दुगु व मल्लकालया उत्तरार्द्धय् थुजागु चिभाः दयेकेगु

परम्परा म्हो जुयावंगु खने दु । स्वयम्भू महाचैत्य, खास्ति चैत्य व चावहीया धन्दु चैत्य लिच्छविकालय हे निर्माण जूगु खँ स्पष्ट जूसां लिच्छवि अभिलेखे गनं नं थुपिं चैत्य तयेगु उल्लेख खनेमदु । केवल विहारया नां जक उल्लेख जुया च्वंगु दु । इतिहासकार पिन्स थुकिया अर्थ थुकथं अनुमान या:गु दु । भारतया विहार निर्माण परम्पराय् विहार नापं तगो चैत्य दयेका चैत्ययात विहारया हे अभिन्न अंगया रूपय् काइगु खः । साँची स्तुप, नालन्दा महाविहारया संरचना आदि आपालं थुकिया उदाहरण त भिसं खंके फु । तिवारी (२००१ पेज ६५) या धापू कथं लिच्छविकालय उल्लेख जुया च्वंगु शिवदेव विहार धैगु खास्ति चैत्य हे खः व चाविहार धैगु आः या धन्दु चैत्य स्थान हे खः । गुइतःया विहारय् लुया वःगु ई.सं ५४० या लिच्छवि अभिलेखं थन विहार निर्माणया गतिविधि लिच्छविकालय जुइधुकुगु खँ प्रमाणित जूगु अनुसार थुपिं तग्वः चैत्य त नं उवलेया विहार निर्माण परम्परानुसार उकथं हे विहारया अभिन्न अंग कथं लिच्छविकालं निसँ हे दया वया च्वंगु धैगु अनुमान याये फु ।

२. **प्रस्तर मूर्तिकला** - वसुच्चशील महाविहारया न्ह्योने च्वंगु थुगु चैत्यस प्रतिस्थापित पञ्चबुद्ध मूर्ति लिच्छविकालया मखुसां चैत्यया नैऋत्य कोण (दक्षिण-पश्चिम कुँ) य् च्वंगु देगःचाय् स्थापना याना तःगु मूर्ति खुगूगु शताब्दीया लिच्छविकालीन प्रस्तरकला खः । अथेहे छगू हे पहःलं दयेका तःगु गुस्तल महाविहारया न्ह्योने च्वंगु 'गःसि चिभाः' या मूर्तित लिच्छवि शैलीया दया च्वंगु दु । थ्व बाहेक थुगु चैत्य लिसे स्वाना च्वंगु च्यागः चैत्य नं शैली कथं लिच्छवि कालया जुया च्वंगु दु । गुस्तल महाविहारया न्ह्योने दुगु गःसि चिभाःस दुगु ने.सं. ३६८ या अभिलेखं थुगु चिभाः थकुरी वंशकालय् हे निर्माण जुइ धुकुगु प्रमाण खः ।

ऐतिहासिक व साँस्कृतिक महत्त्व जाःगु थुगु गुइतःया तग्वः चिभाः दर्शन पूजन परिक्रमा याना ज्ञान वृद्धि पुण्य वृद्धि यायेगु उत्तम पुण्यक्रिया खः । भी पूर्वाचार्यपिन्सं त्वता थकुगु थुजाःगु सम्पदा सम्बन्धी सिकेगु, सयेकेगु, अनुसन्धान यायेगु व थुकिया संरक्षण याना सद्वर्म चीरस्थायी याना तयेगु कुतः दक्क सकलपिं पाखें जुइमा । चिरं तिइन्तु सद्वम्मो ।

सन्दर्भ ग्रन्थ सूची

राजवंशी शंकरमान, २०२८, कान्तिपुर ओबहालटोल ओबहालबारीको शिलालेख, प्राचीन नेपाल, पुरातत्व विभागको मुखपत्र, अंक १६, श्रावण २०२८ (July 16 1971), पुरातत्व विभाग, काठमाडौं

http://himalaya=socanth=cam=ac=uk/collections/journals/ancientnepal/pdf/ancient_nepal_16_04=pdf

राजवंशी, श्याम सुन्दर, २०७२, पाटन गुइतबहीको अप्रकाशित लिच्छविकालको अभिलेख, अभिलेख वर्ष ३३ पूर्णाङ्क ३३, राष्ट्रिय अभिलेखालय

वज्राचार्य, हेराकाजी, २०५६, गुइतःया बहिःविहार संघ (छगू अध्ययन, दीपावती पुस्तकालय, गुइतः, यल ।

शाक्य हेमराज, २०५०, चैत्य थःगु आत्मकथा (संक्षिप्त परिचय, बेखाराज वज्राचार्य, वनवाहा, यल ।

Gutschow, Neils. 1997. *The Nepalese Caitya - 1500 years of Buddhist Votive Architecture in the Kathmandu Valley*. Lumbini International Research Institute.

Regmi, D.R., 1966. *Medieval Nepal Part IV*, author, Patna

Snodgrass, A. 1992. *The symbolism of Stupa*, Motilal Banarasidass, Delhi

Tiwari, S.R., 2001, *The Ancient Settlements of the Kathmandu Valley*. CNAS, TU.

Tucci Giuseppe, 1932. *Stupa: Art, Architecture and Symbolism*, Aditya Prashan Delhi.

पाद टिप्पणी

ⁱ मूल देगः पुनःनिर्माणया भवलय् मूल गन्धुरी देवताया पादपीठया ल्यूलेया भागय् लुयावःगु लिच्छिविकालीन अभिलेखय् लिच्छिवि सम्वत् ४६४ (अर्थात् ई.सं. ५४०) उल्लेख जुया च्वंगु दु ।

ⁱⁱ ने.सं. ७६० या काठमाडौं ओम्बहाल स्थित शिलालेख (राजवंशी, २०२८)

ⁱⁱⁱ ने.सं. ७५७ या क्वावहालया अभिलेख (Regmi, 1966 pg 69)

^{iv} ने.सं. ६५६ या सुवहाल अभिलेख (Regmi, 1966 pg 3)

^v ने.सं. ६६६ या सुवहाल अभिलेख (Regmi, 1966 pg 6)

^{vi} ने.सं. ७३९ या यनमुगल, पाटनया अभिलेख (Regmi, 1966 pg 55)

^{vii} पं. अमृतानन्द वन्द्यजुं वेलायतया विद्वान् ब्रायन हडसनयात ने.सं. १३५ स च्वयाः व्युगु धर्मकोष संग्रहः स थी थी आकार प्रकारया आधारय् चैत्ययात ४४ थी कथं वर्गीकरण याइगु खं उल्लेख जुगु दु । (शाक्य हेमराज, २०५० पेज ४८)

^{viii}हाल थुपिं मध्ये निगः चैत्य खुया यंके धुंकुगुलिं न्हुगु चैत्य पुनर्स्थापन याना तःगु दु ।

^{ix} 'धातु गर्भ' धाःगु थ्वहे खंग्वः अपभ्रंश जुया श्रीलंकाय् डागोवा धायेगु यात । अनलिं अंग्रेज तयेसं थुक्रियात प्यागोडा धायेगु यात ।

^x '... अनुजानामि, भिक्खवे, पञ्च लेणानि - विहारं, अड्डयोगं, पासादं, हम्मियं, गुह'न्ति।' (विनयपिटक - चूलवग्गो पाली - सेनासनक्खन्धकं २९४ - अर्थ - न्याथी कथंया वासस्थान च्वनेत अनुमति विया च्वना - विहार, अध्ययोग, पासाद, हम्मिय व गुहा)

^{xi} १) प्रमुदिता भूमि, २) विमला भूमि, ३) प्रभाकरी भूमि, ४) अर्चचिष्मती भूमि, ५) सुदूर्जया भूमि, ६) अभिमूखी भूमि, ७) दुरंगमा भूमि, ८) अचला भूमि, ९) साधुमती भूमि, १०) धर्ममेघा भूमि, ११) समन्तप्रभा भूमि, १२) निरूपमा भूमि, १३) ज्ञानवर्तीवज्रभूमि

^{xii} स्वयम्भू चैत्यया त्रयोदशभूमि वृत्ताकारयाना दयेका तःगु खः सा हर्मिकाया च्वसं पञ्चबुद्धया पञ्चकुल अंकित हर्मिका पत्र (हलःपौ) तयातःगु दु ।

^{xiii} न्यागू तगिं दुगु यात श्रावकभूमि चैत्य, न्ह्येगू तगिं दुगु यात प्रत्येकभूमि चैत्य, भिन्धूगू तगिं दुगु यात महायानभूमि चैत्य, भिन्धूगू दुगुयात वज्रयानभूमि चैत्य धाई ।

^{xiv} वज्राचार्य हेराकाजी (२०५६) या धापू कथं थुगु प्रकारका स्थापना स्वपूर्वया अवधारणा कथं याना तःगु खः । पूजादि कर्मकाण्डयाइवले वज्राचार्य पिन्सं थःगु न्ह्यःने लाःगु थापं याना तःगु दिशायात पूर्व मानय् याईगु खः । थ्वहे ल्याखं थुगु चैत्यया न्ह्यःने चुलंगु लागु वसुच्चशील महाविहारयात मूल अथवा पूर्वया दिशा माना याना थुकथं पूर्वाभिमुख जुइमाम्ह अक्षोभ्य बुद्ध पश्चिमाभिमुख याना तःगु खः । थुकथं धाये वले पूर्वदिशाया जवय् दक्षिण मानयेयाये माःगु तर थुगु चिभालय् दक्षिणाभिमुखम्ह रत्नसम्भव व उत्तराभिमुखम्ह अमोघसिद्धिया दिशा हिइका मतः। केवल अक्षोभ्य व अभिताभ बुद्धया जक दिशा हिइका तःगु खनेगु ।

मेगु धापू कथं थुगु चैत्यया निर्माण पञ्चबुद्धया सिद्धान्त बाँलाक्क स्थापित मजुनिवले निर्माण जुगु जुया थुकथं दिशा फरक जू वंगु खः ।